

四庫全書

史部

欽定四庫全書

通典卷一百八十六

唐 京兆杜佑 君卿纂

邊防二

東夷下

高句麗

高句麗後漢朝貢云本出於夫餘先祖朱蒙朱蒙母河伯女為夫餘王妻為日所照遂有孕而生及長名曰朱

蒙俗言善射也國人欲殺之朱蒙棄夫餘東南走渡普  
述水至紇升骨城遂居焉號曰句麗以高為氏及漢武  
滅朝鮮以高句麗為縣屬玄菟郡賜以衣幘朝服鼓吹  
常從玄菟郡受之後稍驕恣不復詣郡但於東界築小  
城以受之遂名此城為幘溝淩幘溝淩者句麗名城也  
王莽時發句麗兵以伐匈奴其人不欲行皆亡出塞為  
寇盜莽更名高句麗王為下句麗侯於是貊人寇邊愈  
甚光武建武八年遣使朝貢帝復其王號其國在遼東

之東千里南與朝鮮濊貊東與沃沮北與夫餘接地方  
二千里多大山深谷無原澤隨山谷而為居少田業力  
作不足以自資其俗節於飲食而好修宮室以夫餘別  
種而言語法則多同而跪拜曳一脚行步皆走凡有五  
族有消奴部絕奴部順奴部灌奴部桂婁部本消奴部  
為王稍微弱後桂婁部代之其置官有相加對盧沛者  
古鄒大加主簿優台使者皂衣先人其俗人皆淨潔自  
憙邑落男女每夜羣聚為倡樂好祠鬼神社稷靈星以

十月祭天大會名曰東盟其國東有大穴號禋神亦以十月迎而祭之其公會衣服皆錦繡金銀以自飾大加主簿皆着幘如冠幘而無後其小加着折風形如弁無牢獄有罪諸加評議便殺之沒入妻子為奴婢婚娶之禮略無財幣若受財者謂之賣婢俗甚恥之父母及夫喪其服制同於華夏兄弟則服以三月兵器有甲弩弓箭戟稍矛鋌樂有五絃琴箏箏策橫吹簫鼓之屬賦稅則絹布及粟隨其所有量貧富差等輸之其馬皆小便

登山

本朱蒙所乘馬種即果下也

畜有牛豕豕多白色其人性凶急

有氣力習戰鬪好寇抄沃沮東濊皆屬焉又有小水貊

句麗作國依水而居

漢遼東郡西安平縣北有小水南流入海句麗之別種依小水作居

因名之為小水貊

出好弓所謂貊弓是也至其王宮生而開目

能視國人懷之及長勇壯和帝時頻掠遼東玄菟等郡  
宮死玄菟太守姚光上言欲因其喪發兵擊之尚書陳  
忠曰宮前桀黠先不能討死而擊之非義也宜遣弔問  
因責讓前罪安帝從之明年宮子遂成還漢生口詣玄

菟降詔曰自今以後不與縣官戰鬥而自以親附送生口者皆與贖直縑人四十疋小口半之自爾率服東陲少事其後王伯固死有二子長曰拔竒小曰伊夷模拔竒不肖國人共立伊夷模為王自伯固時數寇遼東又受亡胡五百餘家獻帝建安中拔竒怨為兄而不得立與消奴加各將下戶三萬餘口詣公孫康降還住沸流水降胡亦叛伊夷模伊夷模更作新國都於丸都山下拔竒遂往遼東有子留句麗國古鄒加駁位居是也伊

夷模死子位宮立以曾祖名宮生能開目視及長大果

凶虐

凶 死音

今王生亦能視句麗呼相似為位似其祖故

名之為位宮宮有勇力便鞍馬魏齊王正始三年位宮

寇西安平

在遼東

五年幽州刺史毋丘儉將萬人出玄菟

討之戰於沸流位宮敗走儉追至潁峴縣車東馬登丸

都山屠其所都斬首虜萬餘級六年毋丘儉復討之位

宮輕將諸加奔沃沮儉使王頎追之過沃沮千餘里到

肅慎南界刻石紀功又刊丸都山銘不耐城而還至位



宮五葉孫釗晉康帝建元初慕容皝

音晃

率兵伐之大敗

單馬奔走皝乘勝追至九都焚其宮室掠男女五萬餘

口以歸釗後為百濟所殺其後慕容寶以句麗王安為

平州牧封遼東帶方二國王安始置長史司馬叅軍官

後略有遼東郡至孫高璉東晉安帝義熙中遣長史高

翼獻赭白馬以璉為營州諸軍事高麗王樂浪郡公宋

元嘉中又獻馬八百疋自東晉宋至於齊梁後魏後周

其主皆受南北兩朝封爵分遣貢使初後魏時置諸國

使邸齊使第一高麗次之南齊武帝永明中高麗使至

服窮袴折風中書郎王融戲之曰服之不衷身之災也

頭上定是何物答曰此即古弁之遺像也自東晉以後

其王所居平壤城

即漢樂浪郡王險城自為慕容  
皝來伐後徙國內城移都此城

亦曰

長安城隨山屈曲南臨涓水在遼東南千餘里城內唯

積倉儲器械寇賊至方入同守王別為宅於其側其外

有國內城及漢城亦別都也復有遼東玄菟等數十城

皆置官司以相統攝焉

其地後漢時方二千里至魏南  
北漸狹纔千餘里至隋漸大東

西六其國中書籍有五經三史三國志晉陽秋玉篇字  
千里

統字林自璉七葉至元隋文帝時率靺鞨之衆萬餘騎  
寇遼西隨遣漢王諒總兵討之次遼水大遭疾疫又乏  
糧元復惶懼遣使請罪遂班師至煬帝徵元入朝不至  
大業七年帝親征元師度遼水東城分道出師頓兵於  
其城下高麗嬰城固守帝命諸將攻之又勅諸將高麗  
若降者即宜撫納不得縱兵城將陷賊輒言請降諸將  
奉旨不敢赴機先令馳奏比報至賊守禦亦備隨出拒

戰如此者再三帝不悟食盡師老輸糧不繼諸軍敗績  
還者千人而已是行也唯於遼水西拔賊武列邏而已  
還九年帝復親征乃勅諸軍以便宜從事諸將分道攻  
城賊勢日蹙會楊玄感作亂反書至帝班師兵部侍郎  
斛斯政玄感之黨亡入高麗具知事實悉銳兵來追殿  
軍多敗十年又發天下兵會盜賊蜂起所在阻絕軍多  
失期少至遼水又屬饑饉六軍遽相掠奪復多疾疫自  
黃龍以東骸骨相屬止泊之處軍人皆積屍以禦風雨

死者十有八九高麗亦困弊於守禦遣使乞降因送斛  
斯政以贖罪帝許之頓於懷遠鎮受其降款旋師仍徵  
元入朝不至帝更圖後舉會天下大亂不克行○大唐

武德四年遣使朝貢其國建官有九等其一曰吐捩

昨沒

反舊名大對盧總知國事次曰太大兄次鬱折

之悅

華

言主簿次太大夫使者次皐衣頭大兄東夷相傳所謂  
皂衣先人者也以前五官掌機密謀政事徵發兵馬選  
授官爵次大使者次大兄次收位使者次上位使者次

小兄次諸兄次過節次不過節次先人又有狀古鄒加

掌賓客比鴻臚卿以大夫使者為之又有國子博士大

學博士舍人通事典書客皆以小兄以上為之又其諸

大城置僇

內屋反

薩比都督諸城置處閭近支比刺史亦

謂之道使其武官曰大模達比衛將軍以皂衣頭大兄

以上為之次末客比中郎將以大兄以上為之其次領

千人以下各有差等又其國有五部皆貴人之族也一

曰內部即後漢時桂婁部也二曰北部即絕奴部也三

曰東部即順奴部也四曰南部即灌奴部也五曰西部即消奴部也碣石山在漢樂浪郡遂城縣長城起於此

山今驗長城東截遼水而入高麗遺址猶存

按尚書云夾右碣石

入於河右碣石即河赴海處在今北平郡南二十餘里則高麗中為左碣石

又平壤城東北

有魯陽山魯城在其上西南二十里有葦山南臨涓水

其大遼水源出靺鞨國西南山南流至安市小遼水源

出遼山西南流與大梁水會大梁水在國西出塞外西

南流注小遼水馬訾

則移反

水一名鴨綠水水源出東北

靺鞨白山水色似鴨頭故俗名之去遼東五百里經國  
內城南又西與一水合即鹽難水也二水合流西南至  
安平城入海高麗之中此水最大波瀾清澈所經津濟  
皆貯大船其國恃此為天塹水濶三百步在平壤城西  
北四百五十里遼水東南四百八十里

漢樂浪玄菟郡之地自後漢及

魏為公孫氏所據至淵滅西晉永嘉以後復陷入高麗其  
不耐屯有帶方安市平郭安平居龍文城皆漢二郡諸  
縣則朝鮮藏  
貊沃沮之地又遣使請道教詔沈叔安將天尊像并道

士至其國講五千文開釋玄宗自是始崇重之化行於



國有踰釋典其後東部大人蓋蘇文弑其王高武

其王元在

位十八年高武即元異母弟

立其姪藏為主自為莫離支此官總選

兵猶吏部兵部尚書也於是號令遠近遂專國命蘇文鬚面甚偉形體魁傑衣服冠履皆飾以金綵身佩五刀常挑臂高步意氣豪逸左右莫敢仰視常令武官貴人俯伏於地登背上下馬七年二月遣使內附受正朔請頒歷許之八年三月高祖謂羣臣曰名實之間理須相副高麗稱臣於隋終拒煬帝此亦何臣之有朕敬於萬

物不欲驕貴但據有土宇務共安人何必令其稱臣以自尊大可即詔述朕此懷也裴矩溫彥博進曰遼東之地周為太師之國漢家之玄菟郡耳魏晉以前近在提封之內不可許以不臣若以高麗抗禮四夷必當輕漢且中國之於夷狄猶太陽之於列星理無降尊俯同蕃服乃止貞觀十八年二月太宗謂侍臣曰高麗莫離支賊殺其主盡誅大臣夫出師弔伐須有其名因其殺君虐下取之為易諫議大夫褚遂良進曰兵若度遼事須

尅捷萬一不獲無以威示遠方必更發怒再動兵衆若  
至於此安危難測太宗然之兵部尚書李勣曰近者薛  
延陀犯邊必欲追擊但為魏徵苦諫遂止向若討伐無  
一人生還可五十年間邊境無事至十一月以刑部尚  
書張亮為平壤道行軍大總管自萊州泛海趣平壤又  
以特進李勣為遼東道行軍大總管趣遼東兩軍合勢  
三十日征遼東之兵集於幽州十九年太宗親征渡遼  
四月李勣攻拔盪牟城獲口二萬以其城置盪州勣又

攻遼東城拔之以其城為遼州六月攻拔白巖城以其城為巖州遂引軍次安市城進兵以攻之會高麗北部倭薩高延壽南部高惠真率靺鞨之衆十五萬來援於安市城東南八里依山為陣上令所司張受降幕於朝堂之側夜召文武躬自指揮是夜有流星墜賊營中明日及戰大破之延壽惠真率三萬六千八百人來降上以酋首三千五百人授以戎秩遷之內地餘三萬人悉放還平壤城靺鞨三千人并坑之獲馬五萬疋牛五萬

頭甲一萬領因名所幸山為駐驛山命許敬宗為文勒石以紀其迹遂移軍於安市城南久不尅九月遂班師先遣遼盍二州戶口渡遼乃召兵馬歷於城下而旋城主升城拜辭太宗嘉其堅守賜縑百疋以勵事君者二十一年李勣復大破高麗於南蘇班師至頗利城渡白狼黃嵩二水皆由膝以下勣怪二水狹淺問契丹遼源所在云此二水更行數里合而南流即稱遼水更無遼源可得也旋師之後更議再行二十二年司空房玄齡

病亟乃謂諸子曰當今天下清謐咸得其宜唯東討不  
庭方為國害主上含怒意決臣下莫敢犯顏吾若不言  
可謂銜恨入地遂封表切諫曰臣聞兵惡不戢武貴止  
戈當今聖化所覃無遠不服自古所不臣者陛下皆  
能臣之所不制者皆能制之詳觀古今為中國患害無  
過突厥遂能坐運神策不下殿堂大小可汗相次束手  
分典禁衛執戟行間其後延陀鴟張尋就夷滅鐵勒慕  
義請置州縣沙漠之北萬里無塵至如高昌叛渙於流

沙吐渾首竄於積石偏師薄伐俱從平蕩高麗逋誅莫能討擊陛下責其逆亂殺主虐人親總六軍問罪遼碣未經旬日即拔遼東此聖主之所自知微臣安敢脩說且陛下仁風被於率土孝德彰於配天兼衆美而有之靡不畢具微臣深為陛下惜之重之愛之寶之易曰知進而不知退知存而不知亡又曰知進退存亡而不失其正者其唯聖人乎由此言之進有退之義存是亡之機得有喪之理老臣所以為陛下惜之蓋謂此也老子

曰知足不辱知止不殆臣謂陛下威名功德亦可足矣  
拓地開疆亦可止矣彼高麗者邊夷賤類不足待以仁  
義不可責以常禮古來以魚鼈畜之宜從濶畧若必欲  
絕其種類深恐獸窮則搏且陛下每決死囚必命三覆  
進素食停音樂蓋以人命所重感動聖慈況今兵士之  
徒無一罪戾無故驅之於遼城之間委之於鋒刃之下  
使肝腦塗地魂魄無歸令其老父孤兒寡婦慈母覩輶  
衛音車而掩泣抱枯骨而摧心足以變動陰陽感傷和氣



實天下之冤痛也伏願陛下遵皇祖老子止足之戒以保萬代巍巍之名許高麗自新罷應募之限自然華夷慶賴遠肅邇安臣老病三公朝夕入地謹罄殘魂餘息結草之誠儻蒙錄此哀鳴即臣死且不朽蓋蘇文死其子男生嗣立為其弟男建所逐使其子獻誠詣闕高宗總章元年遣司空李勣伐高麗破其都平壤城擒其王高藏并男建等平其國下城百七十戶六十九萬七千二年移高麗戶二萬八千三百配江淮嶺南山南京西

咸亨元年四月其餘類有酋長鉗牟岑者率衆叛立高  
藏外孫安舜為王令左衛大將軍高侃討平之其後餘  
衆不能自保散投新羅靺鞨舊國土盡入於靺鞨高氏  
君長遂絕武太后聖歷二年鸞臺侍郎平章事狄仁傑  
上表請捐安東復其君長曰臣聞先王疆理天下皆是  
封域之內制井田出兵賦其有逆命者因而誅焉罪其  
君弔其人存其社稷不奪其財非欲土地之廣非貪玉  
帛之貨至漢孝武籍四帝之資儲於是定朝鮮討西域

平南越擊匈奴府庫皆空賊盜蜂起百姓嫁妻賣子流離於道路萬計於是權酤市利算及舟車籠天下貨財而財用益屈末年覺悟息兵罷役封丞相為富民侯然而漢室中分蓋由此起豈不戒哉人有四支者所以捍頭目也君有四方者所以衛中國也然以蝮蛇在手既以斷節全身狼戾一隅亦宜棄之存國漢元帝罷珠崖之郡宣帝棄車師之田非惡多而好少也知難即止是為愛人今以海中分為兩運風波漂蕩沒溺至多准兵

計糧猶苦不足且中國之與蕃夷天文自隔遼東所守  
已是石田韎韜遐方更為雞肋今欲肥四夷而瘠中國  
恐非通典且得其地不足以耕織得其人不足以賦稅  
臣請罷薛訥廢安東鎮三韓君長高氏為其主願陛下  
興存亡繼絕之義復其故地此之美名高於堯舜遠矣

### 東沃沮

東沃沮後漢通焉初武帝滅朝鮮時以其地為玄菟郡  
後為夷貊所侵徙郡於高句麗西北至光武以其渠帥

為縣侯不耐華麗沃沮諸縣皆為侯國後漢末猶置功  
曹主簿諸曹皆減民作之其諸邑落渠帥皆自稱三老  
則故縣國之制也其國在高句麗蓋馬大山之東

合蓋音

東濱大海北與挹婁夫餘南與濊貊接其地東西狹南  
北長可折方千里戶五千土肥美背山向海宜五穀善  
田種無大君主有邑落長帥人性質直強勇便持矛步  
戰言語飲食居處衣服有似句麗其葬作大木椁長十  
餘丈開一頭為戶新死者先假埋之令皮肉盡乃取骨

置椁中家人皆共一椁刻木如主形隨死者為數又有

瓦鏹

鎗也音歷

置米其中編懸之於椁戶邊國小迫於大國

之間遂臣屬句麗復置其中大人為使者使相主領又

使大加統之

大加句麗官號所謂有馬牛羊狗加其所部有大小

責其租稅貂布

魚鹽海中食物千里擔負致之又發其美女以為婢妾

焉魏齊王正始五年幽州刺史毋丘儉討句麗句麗王

宮奔沃沮遂進師擊沃沮邑落皆破之宮又奔北沃沮

北沃沮一名置溝婁去南沃沮八百餘里其俗南北皆

同與挹婁接挹婁喜乘船寇抄北沃沮畏之夏月常在  
山巖深穴中為守脩冬月冰凍船道不通乃下居村落  
毋丘儉遣玄菟太守王頎追討宮盡其東界耆老言國  
人常乘船捕魚遭風吹數十日東到一島上有人言語  
不相曉其俗嘗以七月取童女沉海又言有一國亦在  
海中純女無男人或傳其國有神井闕之輒生子又說  
得一布衣從海中浮出其身衣中國人衣其兩袖長三  
丈又得一破船隨波出在海中岸邊有一人項中復有

面生得之與語不相通不食而死其城皆在沃沮東大海中

挹婁

挹婁魏時通焉云即古肅慎之國也周武王及成王時

皆貢楛矢石砮

楛音戶

爾後千餘年雖秦漢之盛莫能致

也常道鄉公景元末來貢獻楛矢石砮弓甲貂皮之屬

其國在不咸山北在夫餘東北千餘里濱大海南與北

沃沮接不知其北所極廣袤數千里

袤莫條反

土地多山陰



車馬不通人形似夫餘而言語各異有五穀牛馬麻布

出赤玉好貂

所謂挹婁貂是也

無君長其邑落各有大人處於

山林之間土氣極寒常為穴居以深為貴大家接至九

梯好養豕食其肉衣其皮冬以豕膏塗身厚數分以禦

風寒夏則裸袒以尺布蔽其前後其人臭穢不潔作廁

於中園之而居無文墨以言語為約坐則箕踞以足挾

肉啖之得凍肉坐其上令溫煖土無鹽鉄燒木作灰灌

之取汁而食俗皆編髮將嫁娶男以毛羽挿女頭女和

則持歸然後致禮聘之婦貞而女淫貴壯而賤老死者  
其日即葬之於郊野交木作小椁殺猪積其上以為死  
者之糧性凶悍以無憂哀相尚父母死男女不哭泣有  
哭者謂之不壯相盜竊無多少皆殺之雖野處而不相  
犯有石砮皮骨之甲國東北有山出石其利入鐵將取  
之必先祈神其人衆雖少而多勇力處山險又善射弓  
長四尺力如弩矢用楛長尺八寸青石為鏃鏃皆施毒  
中人即死隣國畏其弓矢卒不能服也便乘船好寇盜

隣國患之東夷飲食類皆用俎豆唯挹婁獨無法俗最  
無綱紀至晉元帝初又詣江左貢其石砮至成帝時通  
貢於石季龍四年方達季龍問之答曰每候牛馬向西  
南卧者三年矣是知有大國所在故來焉

勿吉 又曰靺鞨

勿吉後魏通焉在高句麗北亦古肅慎國地邑落各自  
有長不相總一凡七種其一號栗末部與高麗相接二  
曰汨咄 都勿反 部在栗末之北三曰安車骨部在汨咄東

北四曰拂涅

音皇

部在汨咄東五曰號室部在拂涅東六

曰黑水部在安車骨西北七曰白山部在粟末東南勝  
兵各數千而黑水部尤為勁健自拂涅以東矢皆石鏃

長二寸所居多依山水渠帥曰大莫拂瞞

莫千反

咄東夷

中為強國諸國皆患之其國有大水濶三里餘名速末  
水其地卑下濕築堤鑿穴以居室形似塚開口於上以  
梯出入無牛有車馬佃則偶耕車則步推有粟及麥稌  
菜則有葵水氣鹹凝鹽生樹上亦有鹽池多猪無羊嚼

米醞酒飲能致醉婦人則布裙男子衣猪皮其裘頭挿虎豹尾善射其父母春夏死立埋之塚上作屋不令雨濕若秋冬死以其屍餌貂貂食其肉則多得之俗以溺洗手面於諸夷最為不潔孝文延興中其王遣乙力支

朝獻乙力支稱初發其國乘船溯

溯音素

難河西上至大

瀾

瀾音麗

河沉船於水南出陸行渡洛孤水從契丹西界

達和龍乙力支還從其來道取得本乘船達其國焉隋文帝初靺鞨國有使來獻謂即勿吉也

勿吉與靺鞨音相近

西北

與契丹接每相劫掠與中華懸隔唯粟末白山為近煬  
帝初其渠帥突地稽率其部來降居之柳城遼東之役  
突地稽率其徒以從每有戰功從帝幸江都尋放歸柳  
城今郡地大唐聖化遠被靺鞨國頻使貢獻詳考傳記挹  
婁勿吉靺鞨俱肅慎之後裔

### 扶桑

扶桑南齊時聞焉廢帝永元初其國有沙門慧深來至  
荊州說云扶桑在大漢國東二萬餘里地在中國之東

其土多扶桑木葉似桐初生如笋國人食之實如梨而赤績其皮為布以為衣亦為錦作板屋無城郭有文字以扶桑皮為紙無兵甲不攻戰名國王為乙祁貴人第一者為大對盧第二者為小對盧第三者為納咄沙國王行有鼓角導從其衣色隨年改易甲乙年青丙丁年赤戊巳年黃庚辛年白壬癸年黑有牛角甚長以角載物至勝二十斛車有馬車鹿車國人養鹿如牛以乳為酪有赤梨經年不壞多葡萄其地無鐵有銅不貴金銀

市無租估其婚姻法大抵與中國全親喪七日不食祖  
父母喪五日不食兄弟伯叔姑姊妹三日不食設坐為  
神像朝夕拜奠不制縗經嗣王立三年不視國事有宋  
孝武帝大明二年蜀賓國有比丘五人遊行至其國始  
通佛法像教

### 女國

女國慧深云在扶桑東千餘里其人容貌端正色甚潔  
白身體有毛髮長委地至二三月競入水則妊娠六七



月產子女人胷前無乳項後生毛根白毛中有汁乳子  
百日能行三四年則成人矣見人驚避偏畏丈夫食鹹  
草如禽獸鹹草葉似邪蒿而氣香味鹹梁武帝天監六  
年有晉安人渡海為風所飄至一島登岸有人居女則  
如中國人而言語不可曉男則人身而狗頭其聲如犬  
吠其食有小豆其衣如布築土為牆其形圓其戶如竇

文身

文身梁時聞焉在倭國東北七千餘里人體有文如獸

其額上有三文文大直者貴文小曲者賤土俗歡樂物  
豐而賤行客不齎糧有屋宇無城郭國王所居飾以金  
銀珍麗繞屋為塹廣一丈實以水銀雨則流於水銀之  
上市用珍寶

大漢

大漢梁時聞焉在文身國東五千餘里無兵戈不攻戰  
風俗並與文身國全而言語異

琉球

琉球自隋聞焉居海島之中當建安郡東

關川之東

水行五

日而至土多山洞其王姓歡斯名渴刺兜不知其由來  
有國代數也彼土人呼之為可老羊妻曰多拔茶所居  
曰波羅檀洞塹柵三重環以流水樹棘為藩王所居舍  
其大十六間彫禽刻獸多鬬鏤樹似橘而葉密條纖如  
髮紛然下垂國有四五帥統諸洞洞有小王往往有村  
村有烏了帥並以善戰者為之自相立理一村之事男  
女皆以白紵繩纏髮從頭後盤繞婦人以羅紋白布為

帽織鬪鏤皮并雜色紵及雜毛以為衣製裁不一織藤為笠飾以毛羽兵有刀稍弓箭劍鉞之屬編紵為甲或以熊豹之皮王乘木獸令人舉之而行導從不過數十人國人好相攻擊人皆驍健善走難死而耐瘡諸洞各為部隊不相救助兩陣相當勇者三五人相擊射如其不勝一軍皆走遣人致謝即共和解收取鬪死者共聚而食之食皆用手無賦斂有事則均稅俗無文字視月虧盈以紀時節候草枯以為年歲人深目長鼻頗類於

胡人縱年老髮多不白無君臣上下之節拜伏之禮父子同牀而寢婦人產乳必食子衣以木槽暴海水為鹽木汁為酢釀米麴為酒遇得異味先進尊者凡有宴會執酒者必待呼而後飲上王酒者亦呼王名銜杯共飲頗全突厥歌呼蹋蹄一人唱衆人皆和音頗哀怨其死者氣將絕舉於庭浴其屍以布帛纏之裹以葦席襯土而殯上不起墳子為父者數月不食肉有熊羆豺狼尤多猪雞無牛羊驢馬厥田良沃先以火燒而引水灌之

持一插以石為刃長尺餘濶數寸而鑿之土宜播種樹  
木有同於江表氣候與嶺南相類俗事山海之神祀以  
酒散鬪戰殺人便將所殺人祭其神煬帝大業初海師  
何蠻等云每春秋二時天清氣靜東望依稀似有烟霧  
之氣亦不知幾千里三年帝令羽騎尉朱寬入海求訪  
異俗得何蠻遂與俱往因到琉球國言不相通掠一人  
并取其布甲而還時倭國使來朝見之曰此夷邪久國  
人所用也帝遣虎賁郎將陳稜朝請大夫張鎮州率兵

自義安

今潮陽郡

浮海擊之至琉球初稜將南方諸國人從

軍有崑崙人頗解其語遣人慰諭之琉球不從拒逆官軍稜擊走之進至其都頻戰皆敗毀其宮室虜其男女數千人而還

閩越

閩越王無諸

按說文云閩東越地種故字從門出

及越東海王搖者其先

皆越王勾踐之後也姓騶氏秦已并天下皆廢為君長

以其地為閩中郡

今閩州盡是也

及諸侯叛秦無諸及搖率越

人佐漢擊項籍漢五年復立無諸為閩越王王閩中故

地都東冶

今長樂郡地

孝惠三年舉高帝時越功曰閩君搖

功多乃立搖為東海王都東甌

今永嘉郡

時俗號為東甌王

至孝景三年吳王濞反吳破東甌受漢之購殺吳王吳

王之子子駒子華亡走閩越怨殺其父常勸閩越擊東

甌至武帝建元三年閩越發兵圍東甌乃遣莊助以節

發兵會稽遂浮海救東甌未至閩越引去東甌請舉國

徙中國仍率其衆四萬餘人處江淮之間至六年閩越



擊南越上遣大行王恢出章郡

今章郡臨川南康廬陵等郡地

大司農

韓安國出會稽

今吳郡餘杭會稽餘姚東陽臨海永嘉信安縉雲等郡地

兵未踰嶺

閩越王郢發兵距險其弟餘善殺王郢使人謝罪天子

詔罷兵曰郢等首惡獨無諸子繇君

繇邑號

丑不同謀焉

乃立丑為越繇王奉閩越祀餘善已殺郢威行於國天

子聞之為餘善不足復興師曰餘善數與郢謀亂而後

首誅郢師得不勞因立餘善為東越王與繇王並處至

元鼎五年南越反餘善上書請以卒八千從樓船將軍

擊呂嘉等兵至揭陽

今潮陽郡

以海風波為辭不行持兩端

是時楊僕上書願便引兵擊東越帝以士卒勞倦不許

罷兵令諸校留屯章郡梅嶺

今南康郡虔化縣界

待命六年秋餘

善聞樓船請誅之漢兵臨境乃遂反遣兵入梅嶺殺漢

校尉帝遣橫海將軍韓說自句章

今餘姚郡

浮海從東方往

樓船將軍楊僕出武林中尉王溫舒出梅嶺元封元年

冬咸入東越繇王居股殺餘善降於是天子曰東越陋

多阻閩越悍數反覆詔徙其人處江淮間東越地遂虛

即今閩川地也謂封餘善  
為東越王遂謂之東越



通典卷一百八十六

欽定四庫全書

史部  
通典卷一百八十八

詳校官侍郎<sub>臣</sub>李封

編修<sub>臣</sub>程嘉謨覆勘

覆校官助教<sub>臣</sub>吳省蘭

校對官學正<sub>臣</sub>胡予襄

謄錄監生<sub>臣</sub>任兆炯

欽定四庫全書

通典卷一百八十七

唐京兆杜佑君卿纂

邊防三

南蠻上

序畧

南蠻其在唐虞與之要質故曰要服夏商之時漸為邊  
患暨於周代黨衆彌盛故詩曰蠢爾蠻荆大邦為讎至

楚武王時蠻與羅子共敗楚師殺其將屈瑕莫教不設縊

於荒谷羣帥  
囚於治父

楚師後振遂屬於楚及吳起相悼王南并

蠻越遂有洞庭蒼梧之地

今長沙衡陽等郡地

秦昭王使將伐楚

畧取蠻夷置黔中郡

今武陵澧陽及黔中五溪諸郡地

漢興以後時有

寇盜其西南諸夷夜郎之屬悉平定置郡縣

今夜郎播州犍為即

古夜郎地

公孫述時夜郎大姓為漢保境後漢初從番禺江

奉貢光武建武中武陵蠻帥單程

今武陵澧陽黔中寧夷瀘溪等郡即漢武

陵郡

大寇郡縣漢將劉尚戰敗數歲方平順帝時武陵太

守增其租賦蠻又舉種反殺鄉吏東晉時沔中蠻因劉

石亂後漸徙於陸渾以南徧滿山谷宋齊以後荆雍二

州

荆州今江陵郡  
雍州今襄陽郡

各置校尉以撫寧之郡蠻酋帥互受

南北朝封爵至後魏末暴患滋甚僭稱侯王屯據峽路

斷絕行旅周武帝遣陸騰大破之其獠初因蜀李勢亂

後自蜀漢山谷出侵擾郡縣至梁時州郡每歲伐獠以

自利及後周平梁益

梁漢川  
益蜀川

自爾遂同華人矣以其黔

中東謝西趙自古不臣中國大唐貞觀以後置羈縻州

領之

盤瓠種

盤瓠種昔帝嚳時患犬戎入寇乃訪募天下有能得犬戎之將軍頭者妻以少女時帝有畜狗名曰盤瓠遂銜

其將軍首而至乃以女配之

按范曄後漢書蠻夷傳皆怪誕不經大抵諸家所序

四夷亦多此類未詳其本出且因而商畧之曄云高辛氏募能得犬戎之將軍頭者購黃金千鎰邑萬家妻以少女按黃金周以前為斤秦以二十兩為鎰三代以前分土自秦漢分人又周末始有將軍之官其吳姓宜自周命氏曄皆以為高辛之代何不詳之甚又按宋史曄被收後於獄中與諸甥姪書自序云六夷諸序論筆勢



放縱實天下之奇作其中合者往往不減過秦篇嘗共  
比方班氏非但不愧之而已按班賈序事豈復語怪而  
曄紕繆若此又何盤瓠得女負走入南山在國之南即五溪之中山

止石穴中生六男六女因自相夫妻織績木皮染以草

實好五色衣服製裁皆有尾形衣裳斑蘭語言侏離其

後滋蔓號曰蠻夷有邑君長名渠帥曰精夫相呼為婁

徒

說文曰婁女人自稱婁我也烏郎反

所居皆深山重阻人跡罕至長沙

黔中五溪蠻皆是也

一辰溪二酉溪三巫溪四武溪五沅溪

秦昭王使白

起伐楚畧取蠻夷始置黔中郡漢興改為武陵郡

今武陵

陽黔中寧夷瀘溪瀘陽  
靈溪潭陽郡地皆是也歲令大人輸布一疋小口二丈

是謂實布

說文曰實南蠻賦才冬反

雖時為寇盜而郡國討平之後

漢光武建武二十三年十二月武陵蠻精夫相單程等

大寇郡縣遣武威將軍劉尚發南郡

今江陵巴東夷陵

長沙

今長

沙衡陽巴陵郡

武陵

今澧陽武陵黔中郡地

兵萬餘人乘船泝沅水入武

溪擊之

沅水出牂牁故且蘭東北經靈溪長沙巴陵郡入洞庭通江也武溪在今瀘溪郡靈溪縣

尚

輕敵深入悉為所沒又遣伏波將軍馬援將兵至臨沅

今武陵郡武陵縣即漢臨沅縣也

擊破之單程等饑困乞降會援病卒

謁者宗均為置吏以司之羣蠻遂平歷章和安順四朝  
累反叛攻劫州郡討平之永和初武陵太守上書以蠻  
夷率服可比漢人增其租賦議者皆以為可尚書令虞  
詡獨奏曰自古聖王不臣異俗非德不能及威不能加  
其獸心貪婪難率以禮是故羈縻而綏撫之附則受而  
不逆叛則棄而不追先帝舊典貢稅多少所由來久矣  
今猥增之必有怨叛計其所得不償所費帝不從其冬  
澧中淩中蠻

澧水出今澧陽  
郡縣淩音婁

果爭布非舊約遂殺鄉吏

舉種反自後至桓靈二帝又累反叛攻劫州郡討破之

蜀先主章武初吳將李異屯巫秭歸

今巴東郡縣秭音子

先主遣

將軍吳班攻破之於是武陵五溪蠻夷相率響應

今黔中道

謂之五谿

### 廩君種

廩君種不知何代初巴氏樊氏暉氏

音審

氏相氏鄭氏五姓

皆出於武落鍾離山

在今夷陵郡巴山縣

其山有赤黑二穴巴氏

之子生於赤穴四姓之子皆生黑穴未有君長共立巴

氏子務相是為廩君從夷水下至鹽陽

按今夷陵郡巴山縣清江水一

名夷水一名鹽水其源出清江郡清江縣西都亭山

廩君於是君乎夷城四姓皆

臣之巴梁間諸巴皆是也

云即巴漢之地按范曄後漢史云四姓之子未有君長俱事

鬼神乃共擲劍於石穴約能中者奉以為君餘姓悉沉唯中之又令各乘土船約能浮者當以為君餘姓悉沉唯

務相獨浮因共立之是為廩君乃乘土船從夷水下至鹽陽鹽水有神女謂廩君曰此地廣大魚鹽所出願留

共居廩君不許鹽神暮輒來宿詰朝即化為蟲與諸蟲羣飛掩蔽日光天地晦冥積十餘日廩君伺其便因射

殺之天乃開明廩君於是居于夷城四姓皆臣之廩君死魂魄化為白虎巴氏以虎飲人血故以人祠焉是皆

怪誕以戰國時秦惠王并巴中以巴氏為蠻夷君長其此不取

人歲出賦二千一十六錢三歲一出義賦千八百錢其

人戶出帙布八丈二尺雞羽三十鏃

說文曰帙布南郡蠻夷布也帙音公

亞反毛詩四鏃既均儀禮鏃矢一乘鄭玄曰鏃猶候也候物而射之三十鏃百二十也鏃音侯

漢興南

郡太守靳強奏請一依秦時故事至光武建武二十三

年南郡奏潯山蠻雷遷等始反叛

潯音屠

武威將軍劉尚

討破之徙其種人七千餘口置江夏界中其後沔中蠻

是也

漢之江夏郡今竟陵富水安陸齊安漢陽江夏蘄春郡地是也

和帝永元十三年

巫蠻許聖等

漢之巫縣今雲安郡巫山縣也

以郡收稅不均反叛發荆

州諸郡兵

今江陵夷陵澧陽武陵長沙衡陽等郡地也

討破之復悉徙置江

夏靈帝光和三年江夏蠻復反寇患累年廬江太守陸

康討破之

漢廬江即今郡地

### 板楯蠻

板楯蠻秦昭襄王時有一白虎於蜀巴漢之境傷害千

餘人昭王乃募有能殺虎者賞邑萬家時有巴郡閬中

夷

今閬中郡縣

廖仲等射殺白虎昭王以其夷人不欲加封

乃刻石盟要復夷人頃田不租十妻不算

一戶免其一頃田之租稅

雖有十妻不傷人者論殺人得以贖錢贖死何承天纂文曰贖蠻

夷贖罪貨也贖徒濫反盟曰秦犯夷輸黃龍一雙夷犯秦輸清酒

一鍾夷人安之至漢高帝為漢王發夷人還伐三秦關

中秦川地秦地既定乃遣還巴中復其渠帥羅朴督鄂度夕

龔七姓不輸租賦餘戶乃歲入口錢四十巴人呼賦為

賓謂之賓人焉代號為板楯蠻夷閬中有渝水其人多

居水左右天性勁勇初為漢前鋒數陷陣俗喜歌舞喜虛

記反高帝命樂人習之所謂巴渝舞也遂代代服從至後



漢以後郡守常率以征伐靈帝光和三年巴郡板楯蠻

叛

今通川潞山南平涪陵南川清化雲安始寧巴川南賓南浦閬中南充安岳盛山等郡地則巴川之地是

也

寇掠三蜀及漢中諸郡

即漢川諸郡今漢中安康洋川房陵郡地是也

靈帝

乃問益州計吏方畧漢中計吏程苞對曰板楯七姓以

射殺白虎立功先代復為義人其人勇猛善戰昔安帝

永初中羌入漢川郡縣破壞得板楯救之羌死敗殆盡

故號為神兵至桓帝建和二年羌復大入實賴板楯連

摧破之前車騎將軍馮緄南征武陵

緄本反

亦倚板楯以

成其功近益州郡縣亂

今漢川蜀川郡縣地

太守李顯之亦以板

楯討而平之忠功如此本無惡心但長吏鄉亭更賦至

重僕役箠楚過於奴虜闕庭悠遠不能自聞含怨呼天

叩心窮谷故邑落相聚以致叛戾非有謀主僭號以圖

不軌今但遣明能牧守自然安集不煩征伐也帝從其

言遣太守曹謙宣詔赦之即皆降服及漢末天下亂自

巴西之宕渠

今符陽郡

遷於漢中楊車坂抄掠行旅號為楊

車巴魏武克漢中李特祖將五百家歸之魏武又遷於

畧陽北復號之為巴氏

畧陽今天水郡隴城縣

蜀後主劉禪建興

十一年涪陵屬國人夷反

今涪陵郡地

車騎將軍鄧芝往討

皆破平之其沔中蠻至晉時劉石亂後漸得北遷陸渾

以南滿於山谷宋時荊州置南蠻校尉

今江陵郡巴東夷陵雲安等郡

地雍州置寧蠻校尉以領之

今襄陽南陽郡地

如蠻人順附者

一戶輸穀數斛其餘無事宋人賦役嚴苦貧者不復堪

命多逃亡入蠻蠻無徭役强者又不供官稅結黨連羣

動有數百千人州郡力弱則起為盜賊種類稍多戶口

不可知也文帝元嘉中天門

今澧陽郡地

淩中令宋矯之徭

賦過重蠻不堪命蠻田向求等為寇破淩中虜掠百姓

及劉道產善撫諸蠻前後不附官者莫不順服皆引出

平土多緣沔為居道產亡後蠻又反叛孝武帝出為雍

州時巴東

今巴東

建平

今巴東

宜都

今夷陵郡

天門四郡蠻為寇

諸郡人戶流散百不存一孝武即位後大明中西陽蠻

今弋陽郡

皆反叛沈慶之率江雍荆河州諸軍討破之

江今潯陽

鄱陽章郡臨川廬陵等郡地雍已具上荆河今廬江同安郡地

明帝順帝時尤甚雖遣

攻討終不能禁荊州為之虛弊齊高帝時武陵酉溪蠻

田思飄武帝永明初黔陽蠻田豆渠

武陵黔陽皆今五溪中地

湘川

蠻陳雙李答並寇掠州郡討平之

湘川今長沙衡陽地

其後雍司

州蠻

司州今義陽弋陽郡

與後魏通助荒人桓天生侵擾齊境六

年除田駟路為試守北遂安左郡太守田驢王為試守

宜人左郡太守田何代為試守新平左郡太守皆郢州

蠻帥

並漢沔間蠻也其左郡亦茲地焉郢州今江夏漢陽郡地

後魏孝文太和中襄

陽蠻酋雷婆恩率戶千餘內徙求居太和川詔給廩食

後開南陽全有沔北之地

今武當南陽漢東等郡

蠻人安堵不為

寇賊宣武帝景明初大陽蠻酋田育丘等共二萬八千

戶叛齊附魏詔置四郡十八縣魯陽蠻

今臨汝郡魯山縣地

魯北

驚等聚衆萬餘攻逼潁陽詔遣左衛將軍李崇討平之

斬級數千徙萬餘家於河北諸州及六鎮尋叛南走

六鎮

今單于府馬邑郡界

所在追討比及於河殺之皆盡梁武帝遣兵

沿沔破掠諸蠻又遣蔡令孫等三將步騎五千侵南荆

之西沿漢上下

今襄陽郡之上武當郡以東地

破掠諸蠻後魏遣蠻帥

桓叔率蠻夏二萬餘人擊之斬令孫等俘虜二千餘人

其後因六鎮秦

今天水郡地

隴

今汧陽郡地

所在反叛荆

今南陽淮安郡

地郢

今汝南義陽郡

蠻大擾動斷三鴟路

今南陽郡向城縣北至臨汝郡

至於

襄城

今臨汝郡縣

汝水處處抄劫百姓多被其害自後魏與

宋齊梁之時淮汝江漢間諸蠻渠帥互有所屬皆授封

爵焉及魏末為暴滋甚有冉氏向氏田氏者隄落尤盛

大者萬家小者千戶更相崇樹僭稱王侯屯據三峽斷

遏水路荆蜀行人至有假道者西魏文帝大統十一年

沔漢諸蠻擾動大將軍楊忠擊破之其唐州蠻田魯嘉

亦叛

唐州今淮安郡

自號荊河州伯遣王雄討平之後周明帝

時蠻帥冉令賢向五子王等反攻陷白帝

今雲安郡

武帝天

和初詔開府陸騰討斬之蠻衆大潰斬首萬餘級騰乃

積其骸骨於水邏城側為京觀後蠻蜚見者輒大號哭

自此狼戾之心輟矣信州舊理白帝騰更於蜀先主故

城南八陣之北臨江岸築城移置信州又以巫縣信陵

秭歸

今雲安巴東二郡界

並是碛中要險於是築城置防以為襟



帶馬

按後漢書其在黔中五溪長沙間則為蠻獠之後其在硤中巴梁間則為廩君之後其後種落繁盛

侵擾州郡或移徙交雜亦不可得詳別焉

### 南平蠻

南平蠻北與涪州接部落四千餘戶山有毒草及沙蟲蝮蛇人並樓居登梯而上號為干欄其人美髮為椎髻土多女少男為婚之法女氏必先貨求男族貧人無以嫁女多賣與富人為婢俗皆婦人執役其王姓朱氏號為劍荔王○大唐貞觀三年遣使入朝以其地隸渝州

東謝

東謝渠帥姓謝氏南蠻別種在黔中之東地方千里其俗無文字刻木為約巢居刀劍不離其身冠熊皮披猛獸革酋長名元深代襲其一族不育女云高姓不可下嫁○大唐貞觀三年元深入朝冠烏熊皮冠若今之旄頭以金絡額身披毛帔韋皮行滕而著履貞觀中開其

地為應州隸黔州都督府

今黔中郡所管羈縻州

西趙

西趙蠻在東謝之南並南蠻別種其界東至夷子西至昆明南至西洱河山洞深阻莫知里數南北十八日行東西二十三日行風俗與東謝同趙氏代為酋長有萬餘戶自古不臣中國○大唐貞觀三年遣使入朝二十一年以其地置朝州以首領趙唐為刺史

牂牁

牂牁渠帥姓謝氏舊臣中國代為本土牧守隋末大亂遂絕○大唐貞觀中首遣使修職貢勝兵戰士數萬於

是列其地為牂州

今黔中郡  
羈縻州

充州

充州牂牁別部與牂牁隣境勝兵二萬

今黔中郡  
羈縻州

亦貞

觀中朝貢列其地為充州

獠

獠蓋蠻之別種往代初出自梁益之間自漢中達於邛

笮川谷之間所在皆有

此自漢中西南及越  
東皆有之笮才各反

俗多不

辨姓氏又無名字所生男女長幼次第呼之其丈夫稱

阿謩阿段婦人阿夷阿等之類皆其語之次第稱謂也  
依樹積木以居其上名曰干欄干欄大小隨其家之口  
數往往推一酋帥為主亦不能遠相統攝父死則子繼  
若中國之黨族也獠王各有鼓角一雙使其子弟自吹  
擊之好相殺害多仇怨不敢遠行性同禽獸至於忿怒  
父子不相避唯手有兵刃者先殺之若殺其父走避於  
外求得一狗以謝其母然後敢歸母得狗謝不復嫌恨  
若報怨相攻擊必殺而食之遞相劫掠不避親戚賣如

猪狗而已亡失兒女一哭便止被賣者號叫不服逃竄避之乃將買人捕逐若亡叛獲便縛之但經被縛者即服為賤隸不敢更稱良矣唯執楯持矛不識弓矢用竹為簧羣聚鼓之以為音節為紵布色至鮮淨大狗一頭買一生口性尤畏鬼所殺之人美鬚髯者必剝其面皮籠之於竹及燥號之曰鬼鼓舞祀之以求福利俗尚淫祀至有賣其昆季妻孥盡者乃自賣以供祭焉鑄銅為器大口寬腹名曰銅甕既薄且輕易於熟食蜀本無獠

李勢時諸獠始出巴西渠川廣漢陽安資中犍為梓潼

今蜀川之內

布在山谷十餘萬落攻破郡縣為益州大患自

桓溫破蜀之後力不能制又蜀人東流山險之地多空

獠遂夾山傍谷與人叅居叅居者頗輸租賦在深山者

仍為匪人至梁武帝梁益二州

今漢川郡縣地

歲歲伐獠以

自裨潤公私頗籍為利後魏宣武帝正始初將夏侯道

遷舉漢中附魏宣武帝遣尚書邢巒為梁益二州刺史

以鎮之其後以梁益二州控攝險遠乃立巴州

在今清化郡

以統諸獠後以巴酋帥嚴始欣為刺史又立隆城鎮隆城所管獠二十萬戶所謂北獠也歲輸租布魏明帝孝昌初據城叛入梁益二州並遣將討之攻陷巴州執始欣斬之後梁州為梁氏所陷

今漢中郡

自此又屬梁矣後周

武帝平梁

達奚武平之

益

尉遲迴平之

令所在撫慰其與華人雜

居者亦頗從賦役然天性暴亂旋致擾動每歲命隨近州鎮出兵討之獲其生口以充賤隸謂之壓獠焉復有商旅往來者亦資以為貨公卿達於人庶之家有獠口



者多矣其種類滋蔓保據巖壑依林走險若履平地性  
又無知殆同禽獸諸夷之中最難以道義招懷也

### 夜郎

夜郎國

今夜郎播州犍為郡即其國

漢時西南夷君長以十數夜郎

最大在蜀郡徼外東接交趾西隣滇國

今雲南郡滇國

其國隣

牂牁江江廣數里出番禺城下

戰國時楚頃襄王遣將莊蹻從沅水伐夜郎軍

至且蘭船於岸而步戰既滅夜郎因留王滇池以且蘭有牂船牂牁處乃改其名為牂牁牂牁繫船棧也番

禺即今南海郡城南江棧音弋

其地多雨潦俗好巫鬼禁忌寡畜產又

無桑蠶故最貧鉤町有桄榔木可以為麵百姓資之

町鉤

漢以為縣屬牂牁郡鉤音鉅于反町音大鼎反

武帝時唐蒙上書曰竊聞夜郎

精兵可得十餘萬浮船牂牁江出不意此制南越奇兵

也乃拜蒙為郎中遂見夜郎侯蒙厚賜諭以威德夜郎

貪漢繒帛以為漢道險終不能有也乃且聽蒙約還報

乃以為犍為郡

今犍為陽安仁壽義和義資陽皆其地

發巴

巴郡今通川等十五郡地

已具蜀卒

蜀郡今蜀郡濠陽唐安臨邛廬山等郡亦曰蜀川

理道自犍道指牂

牁江蜀人司馬相如亦言西夷邛笮可置郡

今越

帝

使相如往諭皆如南夷為置一都尉十餘縣屬蜀郡當

是時巴蜀四郡

漢中廣漢巴郡今漢川巴川蜀川地也

通西南夷道戍轉

相饗

古餉字

數歲道不通士罷餓離濕

罷音疲離遭也

死者甚衆

夷又數反發兵興擊耗費無功帝患之使公孫弘往視

問焉還言其不便時方築朔方據河逐胡弘因數言西

南夷為害

通西南夷大為損害

可且罷專力事匈奴上罷西夷獨

置南夷兩縣一都尉及元狩元年張騫言使大夏時見

蜀布邛竹杖問所從來曰從東南身毒國

即天竺也

可數千

里得蜀賈人市或聞邛西可二千里有身毒國於是乃令王然於間出西南夷往身毒國至滇道皆為昆明所

閉

昆明在今越  
嵩郡西南

莫能通身毒及南越反上使發南夷兵

且蘭君小邑乃與其衆反漢發巴蜀校尉擊破之遂平

南夷為牂牁郡

今涪川夜郎  
義泉郡地

夜郎侯始倚南越越滅恐

懼遂入朝封為夜郎王昭帝始元中牂牁談指同並等

二十四邑凡三萬餘人皆反

並音伴談指同並後  
皆為縣屬漢牂牁郡

遣水

衡都尉發蜀郡犍為兵擊牂牁大破之後姑繒葉榆人

復反鉤町侯亡波率其人擊之有功漢立亡波為鉤町

王至成帝河平中夜郎王興與鉤町王禹漏卧侯俞

漏卧

侯邑名後為縣屬漢牂牁

更舉兵相攻牂牁太守請發兵誅興等漢

以道遠不可擊遣太中大夫張匡持節和解並不從杜

欽說王鳳曰張匡和解蠻夷王侯不從不憚國威

其效可見恐議者選更復守和解

選更怯懦不前之意選息寃反更人寃反

太守察動靜有變廼以聞如此則復曠一時

曠空也一時三月言

空廢一時不早發兵

王侯得收獵其衆申固其謀黨助衆多各不

勝忿必相殄滅自知罪成狂犯守尉

言起狂悖之心而殺守尉

遠藏

溫暑毒草之地雖有孫吳之將賁育之士若入水火往

必焦沒智勇俱亡所設施屯田備守之費不可勝量宜

因其罪惡未成未疑國家加誅陰勅旁郡守尉練士馬

大司農先調穀積要害處

調發也要害者在  
我為要於敵為害

選任職太

守往以秋涼時入誅其王侯尤不軌者即以為不毛之

地亡用之人聖王不以勞中國

即猶若也不毛  
言不生草木

宜罷郡

放棄其人絕其王侯勿復通如以先帝所立累代之功

不可隳壞亦宜因其萌芽早斷絕之及已成形然後師  
興則萬姓被害矣鳳於是薦陳立為牂牁太守立至牂  
牁迺從吏數十人出行縣召興興將數千人往立數責  
因斷興頭出曉其衆皆釋兵降興子邪務收餘兵迫脅  
旁二十邑反立又擊平之公孫述時大姓龍傳尹董氏  
與郡功曹謝暹保境為漢乃遣使從番禺江奉貢

番禺江今

南海郡

光武嘉之並加褒賞桓帝時郡人尹珍乃從汝南

許慎應奉受經書學成還鄉里教授自是南域始有學

焉珍官至荊州刺史

後漢書云有女子浣於遯水有三節大竹流入足間剖之得一男兒

養之及長自立為夜郎侯以竹為姓武帝元鼎中置牂牁郡夜郎侯迎降天子賜其王印綬後遂殺之夷獠咸以竹王非血氣所生甚重之求為立後牂牁太守吳霸以聞天子乃封其三子為侯死配食其父按范曄所撰乃引華陽國志又按漢書其夜郎侯降封王不言殺之至成帝時猶謂之夜郎王曄焉得云竹王被殺後封其子為侯與班史全乖反用華陽國志為怪詭也大抵范曄著述多稱詭異若無他書何以辯正則因習纂錄不復刊革云

滇

滇者漢時在夜郎之西靡莫之屬滇最大

靡莫西南徼外蠻也滇音



顛始楚頃襄王使將軍莊躋躋即莊王之苗裔居略反將兵循江上

略巴黔以西

巴國今清化始寧咸安符陽巴川南賓南浦是其地也黔即黔中

躋至滇

池方三百里

在今雲南郡其澤在西北水源深廣末更淺狹如倒流故曰滇池

旁平地

肥饒數千里

池旁之地

以兵威定屬楚欲歸報會秦擊楚巴

黔中郡道塞不通因西以其衆王滇變服從其俗以長

之

為其長帥也按史記及漢書皆云楚威王時使莊躋略巴黔以西至滇池欲歸會秦奪楚巴黔中郡因以

其衆王滇後十餘歲秦滅之又按楚自威王後懷王立三十年至頃襄王之二十二年秦昭襄王遣兵攻楚取巫黔中郡地後漢史則云頃襄王時莊豪王滇豪即躋也若莊躋自威王時將兵略地屬秦陷巫黔中郡道塞

不還凡經五十二年豈得如此淹久或恐史記謬誤班  
生因習便書范曄所記詳考為正又按莊蹻王滇後十  
五年頃襲王卒考烈王立二十五年幽王立十年王負  
芻立五年而楚滅後十五年而秦亡凡七十年何故云  
蹻之王滇後十餘歲而  
秦亡斯又未之詳也 至武帝時滇王有衆數萬人元

封二年發巴蜀兵臨滇滇王舉國降請置吏入朝於是

以為益州郡

今雲南郡

賜滇王王印長復其人

武帝割牂牁越雋各數縣

配之後數年復并昆明地皆以屬之

西南夷君長以百數獨夜郎滇受王

印滇小邑也最寵焉後王莽篡位改漢制貶鉤町王為

侯蠻夷盡反莽遣平蠻將軍馮茂發巴蜀犍為吏士賦

取足於人以擊益州出入三年疾疫死者什七巴蜀騷動更遣寧始將軍廉丹大發天水隴西騎士廣漢蜀犍為吏人十萬轉輸者合二十萬人擊之不能尅而還公

孫述據益土文齊為太守亦固守拒述後漢初遣使朝

謁建武十八年夷渠帥棟蠡與姑復葉榆桤棟連然滇

池建伶昆明諸種反叛殺長吏

漢姑復縣屬越雋郡餘六縣並屬益州郡地並

在今越雋雲南郡地

遣武威將軍劉尚等發廣漢犍為蜀人及朱

提夷擊之尚軍遂渡瀘水入益州郡界

瀘水一名若水旄牛徼外經朱

提至犍道入江在今越雋郡南特有瘴氣羣夷聞大兵至皆棄壘奔走尚獲

其羸弱穀畜斬棟蠡帥凡首虜萬餘人諸夷悉平至蜀

後主建興二年諸葛孔明率衆南征四郡平之改益州

郡為建寧分建寧永昌今雲南郡地為雲南郡又分建寧牂

牁為興古郡亮至南中所戰皆捷孟獲者為夷漢所服募生致之既得使觀於營陣之間問曰此

軍何如獲曰不知虛實故敗定易勝耳亮縱使更戰七縱七擒而亮猶遣獲獲不去曰公天威也南人不復反矣遂至滇池南中平皆即其渠率而用之或以諫亮亮曰若留外人即留兵兵留即無食一不易也夷新傷破父兄死喪留外人而無兵者必成禍患二不易也又吏累有廢殺之罪自嫌疊重若留外人終不相信三不易

也今吾欲使汝不留兵不運糧而綱紀粗定夷漢相安故耳

### 邛都

邛都漢時自滇以北君長十數邛都最大

今越嶲郡本其地

自

夜郎滇邛都人皆椎髻左衽邑聚而居知耕田其外西

自桐師以東北至葉榆

葉榆澤名

名為嶠昆明

嶠即今越嶲郡昆明又在

西南諸蠻所居

地方數千里無君長辮髮隨畜遷徙無常武帝

開以為邛都縣屬越嶲郡無幾而地陷為汙澤因名為

邛池南人以為邛河其人後復反叛元鼎六年漢兵自

越雋水伐平之

雋水源出今越雋郡西南雋山下

其土地平原有稻田

俗多遊蕩而喜謳歌畧與牂牁相類豪帥放縱難得制

御王莽時郡守牧根

牧根太守姓名

調邛人長貴以為軍候更

始二年長貴攻殺牧根自立為邛穀王至光武因就封

之授越雋太守印綬後劉尚擊益州夷路由越雋長貴

聞之即聚兵欲襲尚尚掩長貴誅之徙其家屬於成都

安帝時永昌益州蜀郡夷

並今雲南郡

皆叛衆十餘萬破壞

二十餘縣益州刺史張喬乃遣從事楊竦將兵至葉榆

破之渠帥三十六種皆來降附竦因奏長吏姦猾侵犯蠻夷者九十人皆減死論

### 笮都

笮都者漢時自越雋以東北君長以十數徙徙漢為縣屬蜀郡

笮都最大武帝開以為笮都縣其人被髮左衽言語多

好譬類居處略與汶山夷同汶山夷在蜀郡西北即冉駹也今通化郡元鼎

六年以為沉黎郡源今洪郡至天漢四年并蜀為西部置兩

部尉一居旄牛主徼外夷一居青衣主漢人旄牛青衣並今蜀郡

之後漢明帝永平中益州刺史朱輔慷慨有大畧宣示

漢德威懷遠夷自汶山以西前代不至正朔所不加白

狼槃木唐敢等

敢阻留反

百有餘國戶百三十餘萬舉種奉

貢稱為臣僕和帝永光十二年旄牛徼外白狼樓薄蠻

夷王唐繒等遂率種十七萬戶口內屬安帝永和元年

蜀郡三襄種夷與徼外汙許種反叛攻蠶陵城

蠶陵漢縣今臨

翼郡地在蜀郡之西汙音烏許呼五反

殺長吏二年青衣道夷邑長令田

令姓田名也

與徼外三種夷三十一萬口舉土內屬後旄牛



夷叛攻零關

零關道屬漢越雋即今郡

益州刺史張喬與西部尉擊

破之於是分置蜀郡屬國都尉領縣四如太守

### 冉駹

冉駹漢時自笮以北君長十數冉駹最大其俗土著或

隨畜遷徙在蜀西武帝元鼎六年以為汶山郡

今蜀郡西北通

化郡地

至宣帝地節三年夷人以立郡賦重帝乃省并蜀

郡為北部都尉其山有六夷七羌九氐各有部落其王侯頗知文書土氣多寒雖在盛夏冰猶不釋皆依山居

止累石為室高者至十餘丈為邛籠

今彼土夷人呼為彫

又土地

剛鹵不生穀粟麻菽唯以麥為資而宜畜牧有旄牛無

角一名犝牛肉重千斤毛可為毼

犝徒冬反毼音二

出名馬有

羶羊可療毒又有食藥鹿鹿麕有胎者其腸中糞亦療

毒疾又有五角羊其西又有三河槃于虜北有黃石北

地盧水胡其表乃為徼外後漢靈帝時復分蜀郡北部

為汶山郡蜀後主建興十年汶山平康夷反姜維討破

之

附國

附國隋代通焉在蜀郡西北二千餘里即漢西南夷也  
有嘉良夷即其東部所居種自相率領不能統一土俗  
與附國言語少殊其人並無姓氏其地南北八百里東  
西四千五百里無城柵近川谷傍山險俗好復讐故疊  
石為礫而居以避其患其礫與巢字同高至十餘丈下至五  
六丈狀似浮圖於下級開小門從內上通夜必關閉有  
二萬餘家弓長六尺以竹為弦妻其羣母及嫂兄弟死

父兄亦納其妻好歌舞鼓簧吹長笛有死者無服制置  
屍於高牀上沐浴衣服被以牟甲覆以獸皮子孫不哭帶  
甲舞劍而呼云我父為鬼所取我欲報冤殺鬼其俗以  
皮為帽形圓如鉢或戴罽毼衣多毛毼裘毼胡割反全剥牛  
脚皮為鞞項繫鐵釧王與酋帥金飾首胸前懸一金花  
徑三寸其土高氣候涼多風少雨土宜小麥青稞山出  
金銀多白雉水有嘉魚長四尺而鱗細煬帝大業四年  
其王遣子弟宜林率嘉良夷六十人朝貢嘉良有水濶

六七十丈附國水闊百餘丈並南流用皮爲舟而濟附  
國南有薄緣夷風俗亦同西有女國其東北連山綿亘  
數千里接党項及諸羌

按其地接汶  
山故爲附焉

### 哀牢

哀牢後漢時通焉其先有婦人名沙壹居於牢山嘗捕  
魚水中觸沉木若有感因懷妊十月產男子後沉木化  
爲龍出水因舐其男之背其母鳥語謂背爲九謂坐爲  
隆因名曰九隆後漸相滋長種人皆刻畫其身象龍文

衣皆著尾九隆代代相繼乃分置小王往往邑居散在  
谿谷絕域荒外山川阻深生人以來未嘗交通中國光  
武建武中其王賢栗等遂率種人戶二千七百詣越雋  
太守鄭鴻降求內屬帝封賢栗等為君長自是歲來朝  
貢明帝永平中哀牢王柳貌遣子率種人內屬其稱邑  
王者七十人戶五萬一千八百九十四南去洛陽七千  
里明帝以其地置哀牢博南二縣今雲南越雋之西割益州郡  
西部都尉所領六縣後漢六縣謂不韋雋唐北蘇葉榆耶龍雲南並今雲南越雋之西

合為永昌郡

即今雲南郡

始通博南山渡蘭倉水

華陽國志曰博南縣

西山高三十里越之得蘭倉水

行者苦之歌曰漢德廣開不賓渡博南

越蘭津渡蘭倉為他人哀牢人皆穿鼻儋耳

儋耳丁反

其渠

帥自謂王者耳皆下肩三寸人庶則至肩而已土地沃

美宜五穀蠶桑染綵文繡蘭干細布

華陽國志曰蘭干獠言紵也

織

成文章如綾錦有梧桐木華績以為布

廣志曰梧桐有白者剝國有桐

木其華有白毳毳淹績緝以為布

幅廣五尺潔白不受垢汙先以覆亡

人然後服之其竹節相去二丈名曰濮竹出銅鐵鉛錫

欽定四庫全書

正典 卷一百八十七

三

金銀光珠

博物志曰光珠則江珠

琥珀水精瑠璃軻蟲蚌珠孔雀

翡翠犀象猩猩貊獸

山海經云猩猩知人名據華陽國志曰永昌郡有猩猩能言取其血

可以染朱罽荀卿子曰猩猩能言笑淮南萬畢術曰婦終知來猩猩知往注云並神獸也後魏酈元注水經云

武平郡封溪縣有獸名猩猩猿形人面身毛黃姿顏端正善學人語聞者無不酸楚太原王綱著傳云阮研曾

使封溪見邑人說猩猩好酒及麝里人置之山谷常行路數百為羣見酒物等知人設張取之此獸甚靈先知

其人祖父姓名而嘗酒曰奴欲殺我捨爾去也既去復還因相呼曰試共嘗酒及飲乃甘其味逮半醉皆擒之無

遺逸遂置檻中隨其所欲飼之將烹索其肥者乃自推擇泣而遣之又禮記曰猩猩能言廣志云猩猩唯聞其

啼不聞其言出交趾郡封溪縣按前代永昌郡即今之雲南郡武平郡即今之安南府並封畧之內古謂其靈



而智不因人教而解人語殊為珍異秦漢以降天下一家即嶺南獻能言鳥及馴象西域獻汗血馬皆載之史傳以為奇物復廣異聞聲教遠覃如越蒙白雉之類故彰示後代則猩猩不劣於鳥象何為獨無獻乎獲之以充口實則致之固難也王莽置漢孺子於四壁中禁人與語及長不能名六畜猩猩若非靈異自解人語即須因教方成又不可容易而為庖膳也是知諸家所說不加考覈遞相祖述耳佑以為廣志尤足徵矣血染朱罽徧問胡商元無此事故詳而疏之

永昌太守鄭純為政清濇化行夷人

與哀牢夷人約邑豪歲輸布貫頭衣二領鹽一斛為常

賦夷俗安之○大唐麟德元年五月於昆明之柁棟川

置姚州都督府每年差兵募五百人鎮守武太后神功

二年閏十月蜀州刺史張柬之表曰姚州者古哀牢之  
舊國本不與中國交通前漢唐蒙開夜郎滇笮而哀牢  
不附至光武季年始請內屬漢置永昌郡以統理之稅  
其鹽布犴罽以利中土其國西通大秦南通交趾奇珍  
進貢歲時不闕及諸葛亮五月渡瀘收其金銀鹽布以  
益軍儲使張伯岐選其勁卒以增武備前代置郡其利  
頗深今鹽布之稅不供珍奇之貢不入而空竭府庫驅  
率平人受役夷蠻肝腦塗地漢以得利既多歷博南山

涉蘭倉水更置博南哀牢二縣蜀人愁怨行者作歌蓋  
漢得其利人且怨歌今於國家無絲髮之利在百姓受  
終身之酷往者諸葛亮破南中使其渠帥自相統領不  
置漢官亦不留鎮守臣竊以亮之策妙得羈縻蠻夷之  
術今姚府置官既無安邊靜寇之心又無諸葛且縱且  
擒之術唯知詭謀狡筭恣情割剝貪婪劫掠以積為常  
扇動酋渠遂成朋黨提挈子弟嘯引兇愚今見散在彼  
州專以掠奪為業姚州本武陵縣主簿石子仁奏置之

後長史李孝讓辛文協並為羣蠻所殺又使將軍李義  
總往征郎將劉惠在戰陣死其州遂廢即諸葛亮稱置  
官留兵有三不易之言遂驗垂拱四年南蠻郎將王善  
寶昆州刺史爨乾福又請置州奏言所有課稅自出姚  
府管內更不勞擾蜀川及置州後錄事叅軍李稜為蠻  
所殺延載年中司馬成琛請於瀘南置鎮七所遣蜀兵  
防守自此蜀中騷擾於今不息伏乞省罷姚州使隸雋  
府歲時朝覲同之蕃國瀘南諸國悉廢瀘北置關百姓

非奉使入蕃不許交通來往疏奏不納

焦僥

焦僥國後漢時通焉明帝永平中西南夷焦僥貢獻安  
帝永初中永昌徼外焦僥種夷陸賴等三千餘口舉種  
內附獻象牙水牛封牛其人長三尺穴居善游鳥獸懼  
焉其地草木冬落夏生

揮國

揮音檀國後漢時通焉和帝永元中其國王雍由調遣譯

奉國珍寶和帝賜金印紫綬安帝永寧初復遣使朝賀  
獻樂及幻人能變化吐火自支解易牛馬頭又善跳丸  
數乃至十自言我海西人海西即大秦也揮國西南通  
大秦明年元會安帝作樂於廷封雍由調為漢大都尉

西爨

西爨者南寧之渠帥梁時通焉自云本河東安邑人七  
葉祖事晉為南寧太守屬中原亂遂王蠻夷梁元帝時  
南寧州刺史徐文威徵詣荊州有爨瓚者遂據南寧之

地延袤二千餘里俗多華人震翫統其衆○大唐武德  
初拜翫子孔達為昆州刺史令持其父屍歸葬本鄉段  
綸又遣俞大施至南寧諭之由是部落歸款三年七月  
遣使來貢方物

### 昆彌

昆彌國一曰昆明西南夷也在爨之西洱河為界即葉  
榆河其俗與突厥略同相傳云與匈奴本是兄弟國也  
漢武帝得其地入益州部其後復絕諸葛亮定南中亦

所不至○大唐武德四年駕州治中吉弘使南寧至其國諭之至十二月遣使朝貢貞觀十九年四月右武侯將軍梁建方討蠻降其部落七十二戶十萬九千三百

尾濮

尾濮漢魏以後在興古郡

今雲南郡地

西南千五百里徼外

其人有尾長三四寸欲坐輒先穿地為穴以安其尾尾折便死居木上食人俗又噉其老者唯識母而不識父俗有賓客殺老以供厨故賓婚有日老者必泣其地有



稷及陸稻多鹽井饒犀象有弓矢革鎧以赤獠猴皮垂

錫珠翡翠為冠幘按木濮即尾濮也

又扶南土俗傳云拘利東有蒲羅中

人人皆有尾長五六寸其俗食人按其地並西南蒲羅蓋尾濮之地云

### 木綿濮

木綿濮有木綿樹多葉又生房甚繁房中綿如蠶所作

其大如捲

音卷

### 文面濮

文面濮其俗劓面而以青畫之

劓音讒

折腰濮

折腰濮其俗生子皆折其腰

赤口濮

赤口濮在永昌南其俗折其齒剗其脣使赤又露身無衣服

黑黠濮

黑黠濮在永昌西南山居耐勤苦其衣服婦人以一幅布為裙或以貫頭丈夫以穀皮為衣其境出白蹄牛犀

象琥珀金桐華布又諸濮之域皆出楛矢爾雅曰南至  
於濮鉛周書王會卜人丹砂注云卜人西南之蠻丹砂  
所出今按卜人蓋濮人也

按諸濮與哀牢地相接故附之

### 松外諸蠻

松外諸蠻大唐貞觀末為寇遣兵從西洱河討之

洱音貳

其西洱河從鶴州西千五百里其地有數十百部落大  
者五六百戶小者二三百戶無大君長有數十姓以楊  
李趙董為名家各據山川不相役屬自云其先本漢人

有城郭村邑弓矢矛鋌言語雖小訛舛大略與中夏同  
有文字頗解陰陽歷數自夜郎滇池以西皆云莊蹻之  
餘種也其土有稻麥粟豆種穫亦與中夏同而以十二  
月為歲首菜則葱韭蒜菁果則桃梅李柰有絲麻女工  
蠶織之事出絕絹絲布幅廣七寸以下早蠶以正月生  
二月熟畜有牛馬豬羊雞犬飯用竹筩搏之而噉羹用  
象杯形若雞彝有船無車男子以羶皮為帔女子絕布  
為裙衫仍披羶皮之帔頭髻有髮一盤而成形如髻

阻瓜

反

男女皆跣至於死喪哭泣棺槨齮無不畢備三年之內穿地為坎殯於舍側上作小屋三年而後出而葬之蠡蚌封棺令其耐濕父母死皆斬衰布衣遠者至四五年近者二三年然後即吉其被人殺者喪主以麻結髮而黑其面衣裳不緝唯服內不廢婚嫁娶妻不避同姓其俗有盜竊殺人淫穢之事酋長即立一長木為擊鼓警衆共會其下強盜者衆共殺之若賊家富强但燒其屋宅奪其田業而已

通典卷一百八十七

欽定四庫全書

通典卷一百八十八

唐京兆杜佑君卿纂

邊防四

南蠻下

嶺南序略  
蠻獠附

五嶺之南漲海之北三代以前是為荒服秦平天下開置南海等三郡秦亂趙佗據有其地傳五代九十三歲

至漢武建元中伏波將軍路博德滅之分為儋耳等九  
郡其珠崖郡在海洲上大率數歲一反元帝初元中納  
賈捐之議罷之後漢光武建武中交趾女子徵側反略  
有六十餘城伏波將軍馬援討平之桓靈以後蠻獠又  
據象郡象林縣遂為林邑國矣其餘郡縣歷代雖有反  
亂州郡兵旋平定之極南之人雕題交趾其俗男女同  
川而浴題額也雕謂刻其肌肉用青涅之也交趾謂足大趾開闔並立相交其西有叡人  
國生首子輒解而食之謂之宜弟味旨則以遺其君君



憲而賞其父娶妻妾美皆讓其兄烏潁人是也烏潁地在今南

海郡之西南安南府之北朗寧郡營○交趾之南有越裳國周公居攝六

年天下和平越裳以重譯而獻白雉周德既衰於是稍

絕及楚子稱霸朝貢百越秦始皇平天下開嶺外置南

海今南海始興義寧海豐恩平南陵臨賀高要感義晉康臨封開陽高梁連城新興銅陵懷德潮陽等郡地

皆桂林今始安平樂蒙山開江蒼梧潯江臨江鬱林平琴安城賀水常林象郡龍城融水朗寧懷澤寧

仁寧浦橫山修德龍象郡今招義南潛普寧陵水南昌池永定等郡地皆是

城九真福祿文陽日南承化玉山合浦安樂海康溫水湯泉等郡皆是至胡亥時南海尉

任囂病且死召南海龍川令真定人趙佗語曰

漢真定今常山

郡漢龍川今海豐郡

中國擾亂未知所安番禺

今南海郡

負山嶮阻南

北東西數千里可以為國郡中長吏無足與言故召公

告之即被佗書行南海尉事

被加也

囂死佗即絕秦所開

新道聚兵自守秦已滅佗即擊并桂林象郡自立為南

越武王漢已定天下為中國勞苦故釋佗不誅遣陸賈

立佗為南越王高后時佗乃自稱為南越武帝發兵攻

長沙邊邑敗數縣而去

今長沙衡陽等郡

以兵威財物賂遺閩

越

即今閩川

西甌駱越役屬焉

西甌即駱越也言西者以別東甌耳今南海郡西南懷澤

等郡

東西萬餘里南北數千里及孝文帝初立鎮撫天下

乃為佗親塚在真定置守邑歲時奉祀名其從昆季尊官厚賜寵之詔陸賈使往諭之賈至南越王上書謝願為藩臣奉職貢至武帝建元四年佗孫胡時閩越王郢興兵擊南越邊邑胡使人上書曰兩越俱為藩臣無得擅興兵相攻擊今東越擅侵臣臣不敢興兵唯天子詔之於是天子多南越義守職約為遣兩將往討閩越淮

南王上書諫曰夫越方外之地剪髮文身之人也

越人剪髮

古翦字也  
翦與翦同

不可以冠帶之國法度理也自三代之盛胡

越不與受正朔非強不能服威不能制也以為不居之

地不牧之人不足以煩中國也

地不可居而人不可牧養

故古者封

內甸服

封內謂封圻千里之內甸服主理王田以供祭祀也

封外侯服

封外千里之外侯侯

也為王者斥侯

侯衛賓服

侯服之外又有衛服賓見於王侯衛二服同為賓也

蠻夷要服

又在侯衛之外而居九州之內者要言以文德要束之耳

戎狄荒服

此在九州之外者也荒言其荒

忽絕遠來去無常

遠近之勢異也自漢初定以來七十二年吳

越人相攻擊者不可勝數然天子未嘗舉兵而入其地

也臣聞越非有城郭邑里也處谿谷之間篁竹之中

竹叢

也竹小曰篁

習於水鬪便於用舟地深昧而多水險

昧暗也言多草

木

中國之人不知其勢阻而入其地雖百不當其一得

其地不可郡縣也攻之不可暴取也以地圖察其山川

要塞相去不過數寸之間而數百里千里阻險林叢弗

能盡著

不可盡載於圖著張許反

視之若易行之甚難今自攻擊而

陛下以兵救之是反以中國而勞蠻夷也

疲勞中國之人於蠻夷之

地且越人愚戇輕薄

戇陟降反

負約反覆其不用天子之法

度非一日之積也一不奉詔舉兵誅之臣恐後兵革無

時得息也今發兵行數千里負衣糧入越地輿轎而隄

嶺

轎音橋謂隘道輿車也

挖舟而入水

挖音挖也

夏月暑時嘔洩霍

亂之病相隨屬也曾未接刃死傷者必衆矣且越人寡

力薄材不能陸戰又無車騎弓弩之用然而不可入者

以保地險而中國之人不能其水土也

能堪

南方暑濕近

夏瘴熱

瘴黃病丁幹反

暴露水居蝮蛇蠱蟲

蠱音蠱毒也

疾疫皆作

兵未血刃而病死十二三雖舉越國而虜之不足以償

所亡

舉謂總取也

臣聞道路言閩越王弟甲弑王而殺之

者甲

閩王弟之名

甲以誅死其人未有所屬陛下若欲來內處之

中國使重臣臨存

謂省問

以招致之此必携幼扶老以歸

聖德若陛下無所用之則繼其絕世存其亡國建其王

侯此必委質為藩臣代供貢職陛下以方寸之印丈二

之組不勞一卒不頓一戟

頓音鈍

而威德並行今以兵入

其地必雉兔逃入山林險阻

如雉兔之逃竄而入山林險阻之中

背而去

之則復相羣聚留而守之歷歲經年則士卒罷倦

罷音疲

糧食乏絕男子不得耕稼樹種婦人不得紡績織紉

紉女

反今陛下以四海為境九州為家生人之屬皆為臣妾人

徒之衆足以奉千官之供租稅之收足以給乘輿之御

號令天下四海之內莫不響應陛下垂德惠以覆育之

使元元之眚安生樂業則澤被萬代傳之子孫夷狄之

地何足以為一日之間

間讀曰閑得其地物不足為一日閑暇之虞

而煩汗

馬之勞乎帝不從兵未逾嶺閩越王弟餘善殺郢以降



於是罷兵後至孫興立其母太后本中國人勸王及幸

臣上書請比內諸侯三歲一朝其相呂嘉不欲遂反攻

殺太后盡殺漢使者立胡長男建德為王發兵守要害

處於是令越人及江淮以南樓船十萬師往討之元鼎

五年秋衛尉路博德為伏波將軍自桂陽下匯水

今連山郡

有匯水通四會或作湟匯音會

主爵都尉楊僕為樓船將軍出章郡下

橫浦

今南康郡大康縣西南

故歸義越侯二人

故越人降為侯

為戈船下

瀨將軍

瀨水流沙上也伍子胥有戈船以載干戈因謂之戈船

出零陵

今郡或下灘

水

今桂水

或抵蒼梧

今郡

使馳義侯

越人名遺

因巴蜀罪人發夜

郎兵下牂牁江咸會番禺元鼎六年冬樓船將軍將精

卒先陷尋陘破石門

今南海郡北

得越船粟因推而前挫越

鋒伏波將軍將罪人道遠後期與樓船會乃有千餘人

遂俱進樓船居前至番禺建德嘉皆城守樓船自擇便

處居東南面伏波居西北面會暮樓船攻敗越人縱火

燒城越素聞伏波暮不知其兵多少伏波乃遣使招降

者賜印綬復縱令相招

來降者即賜以侯印樓船力攻而放令還更相招喻

燒敵反驅而入伏波營中遲明

遲支二反

城中皆降伏波呂

嘉建德以夜與其屬數百人亡入海伏波遣人追以其故

校尉司馬蘇弘得建德越郎都稽

越中所置郎

得呂嘉戈船

下瀨將軍兵及馳義侯所發夜郎兵未下南越以平遂

以其地為儋耳珠崖南海蒼梧鬱林合浦交趾九真日

南九郡

並今郡地惟交趾則今安南也

置交趾刺史領之自佗王後凡

五代九十三歲而亡焉其珠崖儋耳二郡在海洲上東

西千里南北五百里

今珠崖等郡地

其渠帥貴長耳皆穿珠而

緹之垂肩三寸武帝末珠崖太守會稽孫幸調廣幅布  
獻之蜜不堪役遂攻郡殺幸幸子豹合率萬人還復破  
之自領郡事討擊餘黨連年乃平豹遣使封還印綬上  
書言狀制詔即拜豹為珠崖太守

即就也

威政大行獻命

歲至中國貪其珍賂漸相親侮故率數歲一反至元帝  
時珠崖數反賈誼孫捐之上書請勿擊曰臣聞堯舜禹  
三聖之德地方不過數千里西被流沙東漸於海朔南  
暨聲教迄於四海欲與聲教即理之不欲與者不彊理

也故君臣歌德含氣之物各得其宜武丁成王殷周之大仁也然地東不過江黃西不過氐羌南不過蠻荆北不過朔方是以頌聲並作視聽之類咸樂其生越裳氏重九譯而獻此非兵革之所能致及其哀也南征不還以至於秦興兵遠攻貪外虛內務欲廣地不慮其害而天下潰畔賴聖漢為百姓請命平定天下至孝文皇帝偃武行文則斷獄數百人賦四十丁男三年而一事時有獻千里馬者詔不受其令四方無來獻至孝武皇帝

以國富人逸攘卻匈奴西連諸國至於安息東過碣石  
以玄菟樂浪為郡更移營塞制南海以為九郡則天下  
斷獄萬數人賦數百造鹽鐵榷酒之利以佐用度猶不  
能足當此之時寇賊並起征伐不休之故也今陛下不  
忍涓涓之忿欲毆士衆擠之大海之中快心幽冥之地  
非所以救助饑饉保全元元也詩云蠢爾蠻荆大邦為  
讐自古而患之久矣何況乃服其南萬里之蠻乎駱越  
之人父子同川而浴相習以鼻飲與禽獸無異本不足

郡縣置也顓顓獨居一海之中霧露氣濕多毒草蟲蛇  
水土之害人未見虜戰士自死又非獨珠崖有珠犀瑋  
瑁也棄之不足惜不擊不損威其人譬猶魚鱉何足貪  
也臣竊以往者羌軍言之暴師曾不一年兵出不踰千  
里費四十餘萬大司農錢盡乃以少府禁錢續之夫一  
隅為不善費尚如此況於勞師遠攻亡士無功乎求之  
往古則不合施之當今又不便臣愚以為非冠帶之國  
禹貢所及春秋所理皆可且無以為至初元三年遂罷

之凡立郡六十五歲凡交趾所統雖置郡縣而言語各

異重譯乃通人如禽獸長幼無別項髻徒跣為髻於項上以

布貫頭而着之後頗徙中國罪人使雜居其間乃稍知

言語漸見禮化光武中興錫光為交趾任延守交趾九

真

交趾九真並今之地

於是教其耕稼制為冠履初設媒娉始知

姻娶建立學校導之禮儀建武十六年交趾女子徵側

及其妹徵貳反攻郡徵側者麓泠縣雒將之女也

麓音康今

承化郡地嫁為朱雋人妻素負其雄勇

漢朱雋今安南府縣

交趾太守



蘇定以法糾之側忿故反於是九真日南合浦蠻俚皆

應之凡畧六十五城自立為王交趾刺史及諸太守僅

得自守十八年遣伏波將軍馬援樓船將軍段志發長

沙今長沙郡

桂陽

今桂陽連山郡地

零陵

今零陵江華郡地

蒼梧

今蒙山開

江蒼梧潯江郡地

兵萬餘人討之明年夏四月援破交趾斬徵

側徵貳等餘皆降散進擊九真賊都陽等破降之徙其

渠帥三百餘口於零陵嶺表悉平章帝元和初日南徼

外蠻夷究不事人

蠻夷別號

邑豪獻生犀白雉永光中日南

象林

在日南郡界  
今林邑國

蠻夷二千餘人寇掠百姓於是置象

林將兵長史以防其患順帝永和二年日南象林邑徼

外蠻夷區憐等數千人攻象林縣燒城寺殺長吏州郡

并力討之不利帝召公卿百官及四府掾屬

太尉司馬  
司空大將

軍問其方略皆議遣荆

今南陽江陵江夏安陸  
義陽長沙衡陽等郡地揚

今南陽江陵江夏安陸  
義陽長沙衡陽等郡地荆

今南陽江陵江夏安陸  
義陽長沙衡陽等郡地河

今南陽江陵江夏安陸  
義陽長沙衡陽等郡地荆

今南陽江陵江夏安陸  
義陽長沙衡陽等郡地河

荆揚無事發之可也今二州盜賊盤結不散而復擾動

必更生患又兗州荊河之人遠赴萬里詔書迫促必致

叛亡軍行三十里為程而去日南九千餘里三百日乃

到計人廩五升

古升小故曰五升

用米六十萬斛不計將吏驢

馬之食但負甲自致費便若此九真日南相去千里發

其吏人猶尚不堪何況以四州之卒赴萬里之艱哉前

中郎將尹就討益州叛羌益州諺曰虜來尚可尹來殺

我後就徵還以兵付刺史張喬因其將吏旬月之間破

殄寇虜此發將無益之效州郡可任之驗也宜更選有

勇略仁惠任將帥者以為刺史太守悉使往止交趾府

下

時刺史理廣信今  
蒼梧郡蒼梧縣

今日南兵單無穀守則不足戰又

不能可一切徙其吏人北依交趾事靜之後乃令歸本

還募蠻夷使自相攻有能反間致投首者許以封侯裂

土之賞故并州刺史長沙祝良性多勇決又南陽張喬

前在益州有破虜之功皆可任用昔文帝就加魏尚為

雲中哀帝即拜龔舍為太山今宜即拜良等便道之官

於是拜祝良為九真太守張喬為交趾刺史喬良至單

車入賊地設方畧招以威信嶺外復平其後屢為反叛

州郡兵討降之至靈帝建寧三年鬱林

今郡

太守谷永以

恩信招降烏潯人十餘萬內屬皆受冠帶開置七縣然

自漢以後列置州縣獠俗難理率數歲一亂終不足為

大患

大厯中循州刺史哥舒晃據廣州反詔戶部尚書路典公嗣恭討之晃率其徒拒守凡三歲而滅

### 海南序畧

海南諸國漢時通焉大抵在交州南及西南居大海中

洲上相去或五三百里五三千里遠者二三萬里乘舶

舉帆道里不可詳知外國諸書雖言里數又非定實也其西與諸胡國接元鼎中遣伏波將軍路博德開百越置日南郡其徼外諸國自武帝以來皆獻見後漢桓帝時大秦天竺皆由此道遣使貢獻及吳孫權遣宣化從事朱應中郎康泰使諸國其所經及傳聞則有百數十國因立記傳晉代通中國者蓋尠及宋齊至者有十餘國自梁武隋煬諸國使至踰於前代大唐貞觀以後聲教遠被自古未通者重譯而至又多於梁隋焉其無異

聞亦不復更記

黃支

黃支國漢時通焉在南海日南之南三萬里俗畧與珠崖相類自武帝以來皆獻見有明珠玉璧琉璃奇石異物大珠至圍二寸以下而至圓者置之平地終日不停

哥羅

哥羅國漢時聞焉在槃槃東南亦曰哥羅富沙羅國云其王姓矢利婆羅名米失鉢羅其理城累石為之城有

樓闕門有禁衛宮室覆之以草國有二十四州而無縣  
庭列儀仗有纛以孔雀羽飾焉兵器有弓箭刀稍皮甲  
征伐皆乘象一隊有象百頭每象有百人衛之象鞍有  
鈎攔其中有四人一人執稍一人執弓矢一人執戛一  
人執刀賦稅人出銀一銖國無蠶絲麻紵唯出古貝布  
畜有牛少馬其俗非有官者不得上髮裹頭又嫁娶初  
問婚惟以擯擲為禮多者至二百盤成婚之時唯以黃  
金為財多者至二百兩婦人嫁訖則從夫姓音樂有琵琶



琶橫笛銅鈸鐵鼓簧吹蠡擊鼓死亡則焚屍盛以金甕  
沉之大海

### 林邑

林邑國秦象郡林邑縣地漢為象林縣屬日南郡古越  
裳之界也在交趾南海行三千里其地縱廣可六百里  
去日南界四百餘里其南水步道二千餘里有西屠夷

亦稱王馬馬援所植兩銅柱表漢界柱處馬援北還留  
十餘戶於銅

柱處至隋有三百餘戶悉姓馬土人以為流寓號曰馬  
流人銅柱尋沒馬流人常識其處林邑國記馬援樹兩

銅柱於象林南界與西屠國分漢之南境又云銅柱山  
周十里形如倚蓋西跨重岩東臨大海屈璆道里記又  
云林邑大浦口  
有五銅柱焉  
後漢末大亂縣功曹姓區有子曰連殺

縣令自號為王子孫相承吳時通使其後王無嗣外孫  
范熊代立熊死子逸代立其國有金山石皆赤色其中  
生金金夜則出飛狀如螢火又出瑇瑁貝齒古貝沉木  
香古貝者樹名也其華成時如鷲毳抽以績紡作布潔  
白與紵布不殊亦染成五色織為斑布也沉木香土人  
破斷之積以歲年朽爛而心節獨在置水中則沉故名

曰沉香次不沉者曰棧香也又出猩猩獸

爾雅云肉之美者猩猩之

屑

多琥珀松脂淪入地千歲為茯苓又千歲為琥珀又

云楓脂為之琥珀在地其上及旁不生草木深者或八

九尺大如斛削去皮成焉初如桃膠凝成乃堅其金寶

物產大抵與交趾同以埤為城蜃灰塗之居處為閣名

曰干闥皆開北戶以向日或東西無定尊官有二其一

曰西那婆帝其二曰薩婆地歌其屬官三等其一倫多

姓次歌倫致帝次乙地伽蘭外官分為二百餘部其長

官曰弗羅次曰阿倫如牧宰之差也書樹葉為紙施椰葉為席男女皆以橫幅古貝繞腰以下謂之干漫亦曰都漫穿耳貫小鐶貴者著草履賤者跣行自林邑扶南諸國皆然也其王戴金花冠形如章甫加瓔珞出則乘象吹螺擊鼓罩古貝繖以古貝為幡旗國不設刑法有罪者使象蹋殺之林邑浦外有不勞山罪人亦送此山令其自死其大姓號婆羅門嫁娶必用八月女先求男由貴男而賤女也同姓還相婚姻人性凶悍果於戰鬪

有弓箭刀槊以竹為弩樂有琴笛琵琶五絃頗與中國  
同每擊鼓以警衆吹蠡以節戎其人深目高鼻髮拳色  
黑婦人椎髻四時暄暖無霜雪王死七日而葬有官三  
日庶人一日皆以函盛屍鼓舞導從輦至水次積薪焚  
之收餘骨王則入金甕中沉之於海有官者以銅沉之  
海口庶人以瓦送之於江男女截髮隨喪至水次盡哀  
而止其寡婦孤居散髮至老人皆奉釋法文字同於天  
竺王事尼乾道鑄金銀人象大十圍至晉武帝太康中

又來貢獻成帝咸康二年范逸死奴文篡位奴文昔嘗  
北至洛陽商貨因教王作宮室兵車器械王愛信之使  
為將乃譖王諸子或徙或奔及王死無嗣遂自立為王  
乃攻旁國并之有衆四五萬至穆帝永和三年文率其

衆攻陷日南

今郡地

遂據其地告交州刺史朱蕃

交州今安南府

以求日南

今郡地

橫山為界初徼外諸國常齎寶物

自海路來貿貨賄而交州刺史日南太守多貪利侵侮  
十折二三由是諸國怨憤且林邑少田故貪日南之地

文又襲九真地今郡害士庶十八九文死子佛立猶屯日

南九真太守灌邃率兵討佛走之邃追至林邑時五月

立表日在表北影在表南九寸一分自北影之南故開

北戶以向日此大較也佛乃請降其後頗寇日南九德

之郡今安南日南郡界殺傷甚多交州遂至虛弱至佛曾孫文

敵後為扶南王子當根純所殺大臣范諸農平其亂而

自立為王死子陽邁立死其子咄復名曰陽邁初其父陽邁母

始產夢人以金藉之夷人謂金為陽邁故為名至咄纂父業又名焉宋文帝元嘉中侵暴

日南九德諸郡

宋九德郡今安南日南郡界

宋使振武將軍宗元幹

討之剋林邑陽邁父子並挺身奔逃所獲珍異皆是未

名之寶又銷其金人得黃金數十萬斤其後累代自宋

齊梁陳皆遣使朝貢隋文帝既平陳後遣大將軍劉方

率步騎萬餘擊之其王梵志率其徒乘象而戰方多掘

小坑草覆其上因以兵挑之梵志率衆而陣方偽北走

梵志逐之其象多陷轉相警駭軍遂亂方縱兵擊大破

之遂棄城而走方入其都獲其廟主十八枚皆鑄金為



之蓋有其國十八葉矣方既平其國班師故地遂空梵  
志收拾遺人別建國邑至大唐貞觀中其王范頭利死  
率國人共立頭利女為王諸葛地者頭利之姑子女王  
獨在國中不寧大臣可倫翁定乃立地為王妻之以女  
主其國乃定諸葛地自立後遣使可倫因地盤獻火珠  
形如水精日正午時以珠承影取艾衣之火見云得之

於羅刹國

今之環王國主即梵志之後在  
日南郡西陸行二十餘日方至

扶南

扶南國在日南郡之南海西大島中去日南可七千里在林邑西南三千餘里其境廣袤三千餘里國俗本裸

文身被髮

裸郎果反

不制衣裳其先有女為王號曰柳葉年

少壯健有似男子其南有澗國人名混潰來伐柳葉降之遂以為妻惡其裸露形體乃穿疊布貫其首理其國子孫相傳至王混盤况死國人立其大將范師蔓為王蔓勇健有權略以兵威伐旁國咸服屬之自號扶南大王開地五六十里蔓死國亂大將范尋自立為王是吳

晉時也土地坳下而平博氣候風俗物產大較與林邑  
同有城邑宮室國王居重閣以木柵為城海邊生大若  
葉長八九尺編其葉以覆屋國人亦為閣居為船八九  
丈廣纔六七尺頭尾似魚國王行乘象人皆醜黑拳髮  
裸身跣行耕種為務一歲種三歲穫又好雕文刻鏤食  
器多以銀為之出金鋼可以刻玉狀似紫石英其所生  
乃在百丈水底盤石上如鍾乳人沒水取之竟日乃出  
以鐵鎚之而不傷鐵乃自損以殺羊角扣之漼然冰泮

貢賦以金銀珠香亦有書記府庫文字類胡吳時遣康  
泰朱應使於尋國國人猶髀唯婦人著貫頭泰應謂曰  
國中實佳但人褻露可怪耳尋始令國內男子著橫幅  
今干漫也大家乃截錦為之貧者以布又有老鵬入海  
為玳可以裁作馬勒謂之珂西晉太始太康中皆遣使  
貢獻東晉時有竺旃檀稱王亦遣使其後王姓矯陳如  
本天竺婆羅門也有神語曰應王扶南矯陳如南至盤  
盤扶南人聞之迎而立焉復改制度用天竺法令其國

人居不穿井數十家共一池引汲之俗事天神以銅為像二面者四手四面者八手手各有所持或小兒或鳥獸或日月王坐則偏踞翹膝垂左膝至地以白疊敷前設金盆香爐於其上居喪則削除鬚髮人無禮義男女恣其奔隨宋齊梁並獻方物隋時其國王姓古龍諸國多姓古龍訛耆老言崑崙無姓氏乃崑崙之訛隋代遣使貢獻大唐武德後亦頻來貢貞觀中又獻白頭國二人於洛陽其國在扶南之西在叅半之西南男女生皆

素首身又凝白居山洞之中四面巖嶮故人莫至與叅  
半國相接

頓遜

頓遜國梁時聞焉

一曰典遜

在海崎山上地方千里王並羈

屬扶南北去扶南可三千餘里其國之東界通交州其  
西界接天竺安息徼外諸國賈人多至其國市焉所以  
然頓遜廻入海中千餘里漲海無涯岸舶未曾得逕過  
也其市東西交會日有萬餘人珍物寶貨無種不有又

有酒樹似安石榴採其花汁停酒甕中數日成酒出藿  
香插枝便生葉如都梁以裛衣國有區撥等花十餘種  
冬夏不衰日載數十車貨之其花燥更芬馥亦末為粉  
以傅身焉其俗又多鳥葬將死親賓歌舞於郭外有鳥  
如鵝口鸚鵡而紅色飛來萬許家人避之鳥食肉盡乃  
去燒其骨沉海以為上行人也必生天鳥若迴翔不食  
其人乃自悲復以為已有穢更就火葬以為次行也若  
不能生入火又不被鳥食以為下行也

毗騫

毗騫國梁時聞焉在頓遜之外大海洲中去扶南八千里傳其王身長丈二尺頭長三尺自古來不死莫知其年其王神聖知將來事南方號曰長頸王國俗有室屋衣服噉粳米其人言語小異扶南國不受估客有往者亦殺而噉之是以商旅不敢至王常樓居不血食不事神鬼其子孫死如常人又傳扶南東界即漲海海中有大洲洲上有諸薄國國東有馬五洲復東行漲海千餘



里有燃火洲其上有樹生火中洲左近人剥取其皮紡績作布極得數尺以為手巾與蕉麻無異而色微青黑若小有垢汙則投火復更精潔

干陀利

干陀利國梁時通焉在南海洲上其俗與林邑扶南畧同出斑布古貝檳榔特精好為諸國之極武帝天監中遣使貢方物

狼牙修

狼牙修國梁時通焉在南海中其界東西三十日南北  
二十日行北去廣州二萬四千里其土氣物產與扶南  
畧同偏多棧沉婆律等香其俗男女皆袒而披髮以吉  
貝布為干漫其王及貴臣乃加雲霞布覆胛以金繩為  
絡帶金鐸貫耳女子則披布以瓔珞繞身其國累埽為  
城重門樓閣王出乘象有旛旄旗鼓罩白蓋兵衛甚設  
武帝天監中遣使獻方物其使云立國以來四百餘年

婆利

婆利國梁時通焉在廣州東南海中洲上自交趾浮海  
南過赤土丹丹國乃至其國去廣州二月日行國界東  
西五十日行南北二十日行有百三十六聚土氣暑熱  
如中國之盛夏穀一歲再熟草木常榮海出文螺紫貝  
有石名坭

火談反

貝羅初採之柔軟刻削為物暴乾之遂

堅硬有鳥名舍利鮮人語其國人皆黑色穿耳附璫披  
吉貝如帔及為都漫王乃用斑絲者以瓔珞繞身頭著  
金長冠高尺餘形如弁綴以七寶之飾帶金裝劍坐金

高坐以銀蹬支足侍女皆為金花雜寶之飾或持白朧拂及孔雀王出以象駕輿施羽蓋珠簾其導從吹螺擊鼓國人善投輪刃其大如鏡中有竅外鋒如鋸遠以投人無不中其餘兵器與中國畧同俗類真臘物產同於林邑王姓矯陳如自古未通中國武帝天監中來貢隋大業中又遣使貢獻其王姓刹利耶伽大唐貞觀中又遣使朝貢

槃槃

槃槃國梁時通焉在南海大洲中北與林邑隔小海自

交州船行四十日至其國其王曰楊栗翼音翅栗翼父曰

楊德武以上無得而紀百姓多緣水而居國無城皆豎

木為柵王坐金龍牀每坐諸大人皆兩手交抱肩而跽

暨凡反又其國多婆羅門自天竺來就王乞財物王甚重

之其大臣曰敦郎索濫次曰崑崙帝也次曰崑崙敦和

胡卧反次曰崑崙敦帝索甘且其言崑崙古龍聲相近故

或有謂為古龍者其在外城者曰那延猶中夏刺史縣

令其矢多以石為鏃稍則以鐵為刃有僧尼寺十所僧尼讀佛經皆食肉而不飲酒亦有道士寺一所道士不食酒肉讀阿修羅王經其國不甚重之俗皆呼僧為比丘呼道士為貪隋大業中亦遣使朝貢

赤土

赤土國隋時通焉扶南之別種也直崖州之南渡海水行便風十餘日經鷄籠島至其國所都土色多赤以為號東波羅剎國西婆羅娑國南訶羅旦國北拒大海地方

數千里王姓瞿曇氏名利富多塞不知有國近遠居僧  
祇城亦曰師子城有門三重相去各百許步王宮諸屋  
悉是重閣北面而坐三重榻衣朝霞布冠金花冠垂雜  
寶瓔珞王榻後作一木龕以金銀五香木雜鈿之龕後  
懸一金光焰遠視如項後其官薩陀伽羅一人陀拏拏如  
除達义三人迦利密迦三人共掌政事俱羅末帝一人  
掌刑法每城置那耶迦一人鉢帝十人其俗皆穿耳剪  
髮無跪拜之禮以香油塗身俗敬佛尤重婆羅門婦人

作髻於項後男女通以朝霞朝雲雜色布為衣豪富之室  
恣意華靡唯金鑠非王賜不得服用冬夏常溫雨多霽  
少種植無時特宜稻稌音祭白豆黑麻自餘物產多同於  
交趾以甘蔗作酒雜以紫瓜根戲有雙六鷄卜冬至之  
日影直在下夏至日影在南戶皆北向煬帝時募能通  
絕域大業三年屯田主事常駿虞部主事王君正等應  
召駿等自南海郡乘舟晝夜二旬每值便風至焦石山  
而過東南泊陵伽鉢拔多洲西與林邑相對上有神祠



焉又南行至師子石自是島嶼連接又行二三日西見狼  
牙修國之山於是南達雞籠島至於赤土之界月餘至  
其國都駿等奉詔書上閤王以下至皆坐宣詔訖引駿  
等入宴王前設兩牀上並設草葉盤方丈五尺上有黃  
白紫赤四色之飢牛羊魚蟹猪瑇瑁之肉百餘品延駿  
升牀從者坐於地席及還遣那耶迦隨駿貢方物既入  
海見綠魚羣飛水上浮海十餘日至林邑東南並山而  
行

並音蒲  
浪反

其海水濶千餘步色黃氣腥舟行十日不絕

云是大魚糞也循海北岸達於交趾六年却還到中國  
焉

真臘

真臘國隋時通焉在林邑西南本扶南之屬也去日南  
郡舟行六十日而至南接車渠國西有朱江國王姓刹  
利自其祖漸以強盛至其王質多斯那遂兼扶南而有  
之死子伊奢那先代立大業中遣使朝貢居於伊奢那  
城郭下二萬餘家城中有大堂是其王聽政之所大城

三十所城有數千家各有部帥官名與林邑同其王坐  
五香七寶牀施寶帳以文木為竿象牙鈿為壁狀如小  
屋懸金光焰有同於赤土有五大臣及諸小臣朝於王  
者輒於階下三稽首王喚上階則跪以兩手抱膊繞王  
環坐議政事訖跪伏而去其國與叅半朱江二國和親  
數與林邑陀洹二國戰爭王初立之日所有兄弟並刑  
殘之或去一指或劓其鼻別處供給不得仕進人形小  
而色黑婦人亦有白者悉拳髮垂耳性氣捷勁居處器

物頗類赤土以右手為淨左手為穢飲食多酥酪沙糖  
粃米餅欲食之時先取雜肉羹與飯相和手搗而食之  
其國北多山阜南有水澤地氣尤熱有婆娑樹無花  
葉似柿實似冬瓜菴羅樹花葉似棗實似李毗野樹花  
似木瓜葉似杏實似楮婆田羅樹花葉實並似棗而小  
異歌畢佗樹花似李葉似榆而厚大實似李其大如升  
自餘多同九真海中有魚名建同四足無鱗其鼻如象  
吸水上噴高五十尺有浮湖魚其形似鰕蛄如鸚鵡有

八足多大魚半身出水覩之如山每五六月中毒氣流行即以白豬白羊於城西門外祠之不然五穀不登六畜多死人衆疾疫東有神名婆多利祭用人肉其年王別殺人以夜祠禱有守衛者千人其敬鬼神如此多奉佛法尤信道士佛及道士立像於館大唐武德六年遣使獻方物

羅刹

羅刹國在婆利之東其人極陋朱髮黑身獸牙鷹爪時

與林邑人作市輒以夜晝日則掩其面隋煬帝大業三年遣使常駿等使赤土國至羅刹

投和

投和國隋時聞焉在海南大洲中真臘之南自廣州西南水行百日至其國王姓投和羅名脯邪乞遙理數城覆屋以瓦並為閣而居屋壁皆以彩畫之城內皆王宮室城外人居可萬餘家王宿衛之士百餘人每臨朝則衣朝霞冠金冠耳掛金環頸掛金涎衣

涎叙連反

足履寶裝

皮履官屬有朝請將軍總知國政又有叅軍功曹主簿  
城局金威將軍贊理贊府等官分理文武又有州及郡  
縣州有叅軍郡有金威將軍縣有城局其為長官初至  
各選官僚助理政事刑法盜賊重者死輕者穿耳及鼻  
并鑽鬚私鑄銀錢者截腕國無賦稅俱隨意供奉無多  
少之限多以農商為業國人乘象及馬一國之中馬不  
過千匹又無鞍轡唯以繩穿頰為之節制音樂則吹蠡  
擊鼓死喪則祠祀哭泣又焚屍以鬻盛之沉於水中若

父母之喪則截髮為孝其國市六所貿易皆用銀錢小如榆莢有佛道有學校文字與中夏不同訊其耆老云王無姓名齊杖摩其屋以草覆之王所坐塔圓似佛塔以金飾之門皆東開坐亦東向大唐貞觀中遣使奉表以金函盛之又獻金盃苦盃反金鎖寶帶犀象海物等數十品

丹丹

丹丹國隋時聞焉在多羅磨國西北振州東南

振州今延德郡



珠崖同  
島山上

王姓刹利名尸陵伽理所可二萬餘家亦置州

縣以相統領王每晨夕二時臨朝其大臣八人號曰八座並以婆羅門為之王每以香粉塗身冠通天冠掛雜寶瓔珞身衣朝霞足履皮屨近則乘輿遠則馭象其攻伐則吹蠡擊鼓兼有幡旗其刑法盜賊無多少皆殺之土出金銀白檀蘇方木檳榔其穀唯稻畜有沙牛殺羊猪鷄鵝鴨麋鹿鳥有越鳥孔雀果蓏力果反有蒲桃石榴瓜瓠菱蓮菜有葱蒜蔓青

邊斗

邊斗國

班斗一云

都昆國

都軍一云

拘利國

九離一云

比嵩國並隋時

聞焉扶南度金隣大灣南行三千里有此四國其農作  
與金隣同其人多白色都昆出好棧香藿香及流黃其  
藿香樹生千歲根本甚大伐之四五年木皆朽敗唯中  
節堅固芬香獨存取以為香

杜薄

杜薄國隋時聞焉在扶南東漲海中直海渡數十日而

至其國人貌白皙皆有衣服國有稻田女子作白疊華  
布出金銀鐵以金為錢出鷄舌香可含以香不入衣服  
鷄舌其為木也氣辛而性厲禽獸不能至故未有識其  
樹者華熟自零隨水而出方得之杜薄洲有十餘國城  
皆稱王

薄刺

薄刺國隋時聞馬在拘利南海灣中其人色黑而齒白  
眼睛赤男女並無衣服

敦焚

敦焚洲抱朴子云敦焚洲在南海中薰綠水膠所出膠

如楓脂所以不可多得者止患狷狃

上音吉  
下音屈

獸啖人此

獸大者重十斤狀如水獺其頭身及他處了無毛唯從

鼻上以竟脊至尾上有毛廣一寸許青毛長三四分許

其無毛處則如韋囊人張捕得之斬刺不傷積薪烈火

縛以投火中薪盡而此獸不焦湏以大杖打之皮不傷

而骨碎都盡乃死耳

## 火山

火山國隋時聞焉去諸薄東五千里國中皆有火雖雨不熄中山有白鼠扶南土俗傳云火洲在焉五洲之東可千餘里春月霖雨雨止則火燃洲上林木得雨則皮黑得火則皮白諸左右洲人以春月取其木皮績以為布或作燈炷布若小穢投之火中復潔又有加營國北諸薄國西山周三百里從四月火生正月火滅火燃則草木葉落如中國寒時人以三月至此山取木皮績為

火浣布

無論

無論國隨時聞焉在扶南西二千餘里其國大道左右  
夾種枇杷樹及諸華果行其下常有重陰十里一亭亭  
皆有井食麥飯飲蒲桃酒如膠若飲即以水和之味甚  
甘美

婆登

婆登國在林邑南海行二月東與訶陵西與迷黎車接

北隣大海風俗與訶陵同種稻每月一熟有文字書於貝多葉其死者口實以金又以金釧貫於四支然後加以婆律膏及檀沉龍腦等香積薪以燔之大唐貞觀二十一年遣使朝貢

烏篤

烏篤國在中天竺南一名烏伏那地方五千餘里百姓殷實人性懦弱頗詭詐尤工禁術篤信佛法文字禮儀畧同天竺自古不通中國大唐貞觀中其王達摩因陀

訶斯遣使獻龍腦香

陀洹

陀洹國在墮和羅西北大唐貞觀中遣使獻鸚鵡毛羽  
皓素頭上有紅色數十莖與翅齊

訶陵

訶陵國去真臘之南大唐貞觀中遣使獻金花等物王  
之所居豎木為城造大屋重閣覆以椶櫚所座牀悉以  
象牙為之食以手掬之

掬古  
惠反

又以椰樹花為酒飲之亦



醉有山穴每涌而出鹽國人取之以食其國別有毒人  
與常人同止宿則令身上生瘡與之交合便即致死若  
涎液濡著草木即枯其人身死不爛不臭

多蔑

多蔑國大唐貞觀中通焉在南海邊界周廻可一月行  
南阻大海西俱游國北波刺國東阨洹國戶口極多置  
三十州不役屬他國有城郭宮殿樓櫓並用瓦木以十  
二月為歲首其物產有金銀銅鐵象牙犀角朝霞朝雲

其俗交易用金銀朝霞等衣服百姓二十而稅一五穀  
蔬菜與中國不殊

多摩長

多摩長國居於海島東與婆鳳西與多隆南與羊支跋  
華言五山也北與訶陵等國接其國界東西可一月行  
南北可二十五日行其王之先龍子也名骨利骨利得  
大鳥卵剖之得一女子容色殊妙即以為妻其王尸羅  
劬庸伊說即其後也大唐顯慶中遣使貢獻其俗無姓

王居以柵為城以板為屋坐獅子座東向衣物與林邑  
同勝兵二萬餘人無馬有弓刀甲稍婚姻無同姓之別  
其食器有銅鐵金銀所食尚酥乳酪沙糖石蜜其家畜  
有羖羊水牛野獸有麋鹿等死亡無喪服之制以火焚  
其屍其音樂略同天竺有波那婆宅護遮菴磨石榴等  
果多甘蔗從其國經薩盧都思訶盧君那盧林邑等國  
達於交州

哥羅舍分

哥羅舍分在南海之南其國地接墮和羅國勝兵二萬人其王滿越伽摩大唐顯慶五年遣使朝貢

